


KUSHINIKISHA

KYAMBO KYANJI

 Twayai tukunyike mitwe yetu pa kakimye kacheche. Mutemwe Taata Wamwiulu, tuji bingi nalusekelo byo tuji muno bufuku buno. Atweba, twasanta bingi pa kuyuka mba Kyeenyi Kyenu kiji muno ne atweba. Pano twalomba mba Anweba musa kwingila ku umo umu mwi atweba, nobe byonka byo tubena kukeba. Twikipuzha mu Jizhina ja Yesu. Amena. (Anweba ikalaiko.)

Nauwatu bulongo na ao maikolofoni ajiko. Amiwa najinga wabulanda nakyokya kyatama kyamwekele kesha japita, Mbila Amiwa yonakebele anweba kuteleka kyatama bingi.

² Kabiji Amiwa nakebele anweba kwikimona kiine. Ke akwa—ku kwikajikwa kotujinako atweba. Atweba kechi twaikajikwa pa kipwilo ne. Atweba twaikajikwa mwi Kilishitu, mwamona. Aye jojoja Jishinda jimo. Aye kyo kyonka kifulo kya bukikizhi, kyo kyonka kifulo Lesa kyo abikilepo Jizhina Janji. Kabiji Lesa waambile mba Aye ukasambakana bantu mu kifulo akyo Aye kyoasalulwile kubikapo Jizhina Janji; kechi pa kibelo kiji kyonse ne, kana ponka pa kibelo apo Aye poasalulwile. Kabiji pa kyokya kifulo Aye ukasambakana bantu, kabiji akwa konka kwa. Kabiji twatana mba Lesa kechi wabikilepo Jizhina Janji kuji konse ne kanatu mu Mwaana Wanji, Yesu Kilishitu, nobe mwaana kimye kyonse byo asenda jizhina ja taata.

Kabiji pano mwaamba mba, “Kyawama, akye kyatala muka leelo? Kila umo umo waamba mba, ‘Amiwa nji mwi Yesu.’”

³ Aye ye Kyambo. Abya, “Muntendekelo mwajinga Kyambo, ne kyokya Kyambo kyajinga na Lesa, kabiji akya Kyambo kyajinga Lesa. Akya Kyambo kya alwilwe ke muntu ne kwikala waikelenga muno mwetu.” Ne jikwabo, kyanembwa mu Lumwekesho kyapitala kyabu 19, byo twamumwene Aye kasa eya, Musongwa ne Musongoshi, Kyanji kivwalo kyaibizhiwe mu Mashi, “Jizhina Janji jatelelewe mba ‘Kyambo kya Lesa.’” Aye ye Kyambo kya Lesa.

⁴ Kabiji, akyo, Aye bo bulume bwakusangulula. Aye ye Mupashi Wazhila ke, abwa—abwa mubulume bwakwalulwa abo bwiya kubulume byakumubiji, ke Byambo, kilenga Akya kwikala kyumi. Kabiji byonse byafwainwa kwingijila pamo, nangwa kechi kyakonsha kwingila ne. Kyafwainwa kutola Baibolo yense, Kilishitu yense, Mamboawama onse.

⁵ Amiwa nakeba kwamba, pa jije jibumba ja bajinga pa mashikopo bufuku bwapita, kasa nayuka mba kikeya

kwikala byonkabyo, kabiji Amiwa natambilenga. Amiwa nasaka kutakaika abo batemwe, aba bajinga pa yewa muntanchi wajibumba, namambo akupana mikumbu ya mutende yafikilamo! Kabiji Amiwa ne kajimbulushi wavula, mwayukatu, nangwa byonkabyo, bino kechi kwajingapo kintu kya kujimbulula ne. Kyajinga kyakine, kabiji Amiwa nakonsha kuswa kyokyo, aduledi paseti umo. [Kipwilo kyaponena mutuseko—Waku.] Nasanta bingi. Amena. Abo mikumbu yabo yajinga bulongo pakishina kata. Amiwa kine nasanta pakyokyo. Amiwa nanchi inge Najinga na filimu wa kumweshwa mu kipwilo kyami ku muzhi. Kyajinga kyawama bingi.

⁶ Kabiji Amiwa nasanta bingi pa kuyuka mba—mba Lesa waingila mu mashinda akwabo, kufumyako mabumba etu aba Pentekosito, kabiji babena kusenda banabalume, awa lukunwa wa Lesa, ao waikala popa pa yonse ye myaka, na kupembelela Kyeya ki isamine.

⁷ Kabiji kitupa atweba lujimuno, balunda, pa kuyuka mba Yesu waambile mba, “Kimye awe kisungu wakosama byo aishile na kupota Manyi, akya kyajinga kimye Musongoshi kyo ayishilenga.” Nanchi twakonsha kumona na kyokyo, inge twamona Episcopalian, Presbyterian, Methodist, Baptist, Lutheran, kwiya na kutambula Manyi, nanchi akya kyajinga awala Musongoshi kyo ayishijilemo. Twayai tuvuluke kyokyo.

⁸ Amiwa kechi najinga na Billy, mwanami, kwamba byo byo kwi amiwa byonka byo aubile mu bimye bicheche byapitapo. Aye waambile mba, “Taata, Amiwa kechi mbena kwimubuula bya kuuba ne. Amiwa kechi natazha mu kuuba mba kwimumvwisha bulongo anweba na kintu kiji kyonse ne, bino,” waambile mba, “taata, kyonse kyo muuba, bikai kimye kyenu kyonse pa boba bantu bakolwa.” Aye waambile mba, “Amiwa kechi namonapo bavula bantu bakolwa ne!” Waambile mba, “Amiwa na kupana bitupa tuu aduledi pa kimye kicheche nangwa bibiji.” Waambile mba, “Kuji ne bantu bavula bakolwa!” Aye kechi wambula pabaya bingi ne.

⁹ Kabiji pano Naiya bufuku buno na byanembwa bicheche byanembwa papo, kabiji ne byambo bicheche pa luzhachisho lubena kwiya, kabiji twayuka mba atweba tubena kwikala kuno bufuku buno na bobwa bukaji bwa Lesa bubena kwitufikila atweba, kabiji katatakatu aye akebifumyepo. Kabiji byo twayuka mba bukaji bwa Lesa bubena kupembelela; pa kyonka kimye po kikambwa, kikekala kyapwa, mu mamilyoni. Kabiji byo twayuka mba mu muchima wami, kabiji ne kuyuka mba byokiji! Kabiji pano twamona bavula bakolwa, kuya kulutwe ne kutwajijilatu.

¹⁰ Kabiji Nalangulukile mba, “Bufuku buno, bavula Benakilishitu.” Kabiji lekai ami ng’ambe ku kikyeye, anweba baana bakwa Lesa. Kyonse kyomuba, mwafwainwa kuleka

kyonse kyafwainwa kuya. Mwingijile Lesa, bufuku ne mute, na muchima wenu yense. Anweba, anweba mwakonsa kumvwa mba pajipo kintu kimo kyatama. Anweba mwakonsha kwikyamba anweba pakwenda mumikwakwa, anweba mujitu...kabiji konse ko muya. Mwayuka, inge wi wa bumupashi; kabiji Nayuka mba byo uji.

¹¹ Kabiji Naambilenga ku muntu, Mulongo Stromei. Amiwa kechi nayuka ne kana Tony uji muno, nangwa ine. Aye, aye wajinga...[Ke mulongo waambile mba, “Tony Salameh?”—Waku.] Tony Salameh, Salameh, Salameh? Ine. Najinga na Tony ungi. [Ke mulongo waambile kintu kimo.] Ine, awa ke Tony ungi. Awe ye Tony wa—wa—wa ku Tucson. Ng’anyi jizhina? [Muntu umo waambile mba “Stromei.”] Stromei! Amiwa nayuka mba Salameh, Stromei, nangwa mukwabo. Amiwa natambula byonse...

¹² Mu shitolo wanji, juba jikwabo, mwajinga muntu waishile, wajinga bingi lubilo, aye waambilenga kintu kimo kyaletete kulabijila kwi amiwa, kimye kyo Amiwa...kimye kyapeleleko kyo Amiwa najinga mu—mu India.

¹³ Kwepi, Nalanguluka mba Nkambo witupele jibumba jikatampe bingi jotwajinga najo pa kimye kimo, jajinga mu Bombay. Atweba kechi twakonsha kutana ne mampuzha kuji konse mu kwibabika, biumbi bya jikumi ne biumbi bya bantu ne.

¹⁴ Kabiji kasa tukyangye kufikako ne, kwajinga pepala wa majashi a byambo antuntululwa. Kyawama, kyajinga, India ke kyaalo kya milaka ibiji, kyajinga—kyajinga kipepala kya Kizungu. Kabiji waambile mba, “Kyawama, bitentanshi bya byafwainwa kupwa, bang’onyi babena kutumbuka kubwela ku nzubo yabo mu binsa byato.”

¹⁵ Ke moba acheche kasa kitentashi kikyangye kwiya, akya kyakundwile byaamba ne bintu. Aba bang’onyi bajin ne pabo pakukala mumabwe, kabiji ne kushimika binsa byabyo; kabiji mu kimye kyamabanga amute nangwa kina mute, kimye kyakuba mba juba popene pojakaba, banyama bonse baimana nakuzhokoloka kubibumba byajimbwe, mukwikala mu kimfutele. Kabiji pa moba abiji, bang’onyi bekala ku bichi, abo kechi bakonsha kuya ku binsa byabo ne; kabiji pa moba abiji, banyama, mikoko ne bang’ombe, abo kechi bakonsha kwiya kuzhokoloka mukimye kyamute amabanga, nangwa kutanwa kuzhokoloka kubibumba. Abo—abo baikele monka mubujimi kabiji ne kwiimena umo ne mukwabo, mukifuntele.

¹⁶ Nanchi byonse pakimye kimo, akya kitentashi, kyasunkenye bibumba byonse kukundaula bishimikwa. Kabiji, monai, inge aba bang’onyi bacheche bajinga monka, bafwaijilwe konaunwa. Inge ng’ombe wajinga na kwimana munshi yakyokya, kabiji ne mukoko, abo inge baonaika. Lesa wajimuna bilengwa byanji!

¹⁷ Moba acheche apitapo, monka mu shitolo wa kwa Mulongo Tony, Natelekelenga ku muntu umo waambile mba... Kimye akye kitentashi byo kyaubikilwe mu puzha ya Alaska, aye wakwachilenga masabi amwa mutelwa mba Stony Point, ku Mexico. Kabiji aye waambile mba, “Bang’onyi kechi banjilenga ne, kabiji aja jisabi kechi jakonsheshe kuja ne. Kwajinga kintu kimo kyatama. Kabiji, ponkapotu, kitentashi kyalupukile.”

¹⁸ Kabiji juba jikwabo, akya kimo byo kyaamwekele ku India, nangwa konse ko kyajinga, waambile mba aye wakwajilenga masabi jibiji. Aye walangulukile mba, “Kyawama, ke kyenji. Aa masabi aja mukino kimye. Akwa kechi kujipo kintu mumema ne, jikwabo ne. Aa mema azhindamatu nzoo, mukimye kyalumbuluka masabi afwainwa kuja, bino kechi ajile ne. Kabiji bang’onyi bonse javula bajinga kokwa, aba bang’onyi, mukusenda masabi ne bintu bikwabo, byonsetu byaendelenga kuzhokoloka kukitulu, kabibena kwiimena umo ne mukwabo. Mu bimye bicheche, bijimwa bya pa meema byafuma panshi kutatula kulupuka nobe *byobya*, kitentashi kya mwekele kulubaji lukwabo lwa pantanda.” Monai, aja jisabi jayukile mba pajipo kintu kimo kyatama, kintu kimo kyafwainwa kumweka. Atwa tung’onyi twayukile kintutu kimo.

¹⁹ Kine, inge Lesa wapana ku jisabi ne ng’onyi kuyuka bapashi, pano ibyepi Aye kupana ku Banji—Banji baana! Twayuka mba tuji mukimye kya kumpelo, kabiji luzhachisho lubena kupembelela, nanchi twayai twikale na munema. Nyemenai kwi Lesa na muchima wenu yense! “Obewa Kapenama, obewa witumbijika mwiulu, ukaletwa panshi mu kalunga kabafu,” kabiji leelo unji panshi ya mwanya wa meema. Anweba vulukaitu, kabiji lombai.

²⁰ Pano, bufuku buno, Nasaka kutanga pantu pamo mu Kinembelo, pa mamineti achechetu. Tusa kulombelela bakolwa. Billy wajikwamba mba napana bitupa bya milombelo. Kabiji aye wapaine bimo kesha japita, kabiji Amiwa kechi nakwachileko bufuku bwapita ne. Kabiji Nakuminye, kimye Mupashi Wazhila kyo aishile... Kijitu... Obewa kechi wakonsha Kwikilengela kwingila ne. Kijitu pamo nobe kaleva kakacheche, kwibika obewa mwine mu giya. Obewa yobe iye wingijisha Mupashi Wazhila, kechi ami ne. Ubowe yobe uba kyokyo obewa mwine. Nanchi Amiwa, bufuku bwapita, Namwene ne mu kuyuka bapashi, kechi bekisendelepo na bantu baoloka ne. Abo kechi bamwekele nobe bakonsha kusendwa nakyo ne. Amiwa nekitana, kuno kimye kyapwa kala, kibena kumweka nobe, byavula nangwa byakepa, nobe byonka byo Naambilenga, na kubika maboko pa bakolwa, abo bayuka.

²¹ Twafwainwa kuyuka mba mwi atweba twapewa, atweba twaketekela Yesu Kilishitu kabiji twasemekwa ku Mupashi Wanji kabiji ne kuyuzhiwamo na bulume bwa kusangulula, abwa bulume buji mwi anweba. Na kubikapo maboko, pa

bakwabo, nobe byaubile banababwanga kabiji ne kupita mu nkulo, Kyakiine kyabukile bakolwa, kyangwile bafwa, Kya mwesheshe bimwesho, byabungauzhi. Kabiji yenka Mupashi umo waikela mu batumwa batanshi ubena kwikala mu kipwilo leelo, kwingila byonka bintu bimo. Kabiji monka motwafwainwa kutulukila kyokyo! Mwamona, nangwa kikaletu byepi kibena kwingila, mwafwainwa kuyuka kyokyo ne kuketekela kyokya. Kechi kikoobapo kintu kimo kyawama ne, poso mwikiketekela. Pakuuba kimye kyo waketekela kyokyo, lukatazho lobe lwapwa. Akyo kine.

²² Pano twayai tuzhikule mu Kinembelo. Amiwa naikelenga popa, pa mamineti acheche apitapo, kasa mbena kunemba Binembelo bicheche, mu kukyingya byambo byami bufuku buno. Kabiji Nakeba kutanga bimo kufuma mu Kyambo kya Lesa, kufuma mu Buuku wa Luka Wazhila, kyapitala kyabu 8, kutatwila na veeleshi wabu 40. Telekai pano, Amiwa mbena kutanga kyabaya.

Kabiji ponkapo kyafikizhiwe, kuuba mba, Yesu byo abwelele, bantu bamutambwile aye: mambo bonse bapembejilenga aye.

Bushe kyokyo kechi kyakonsha kwikala ngubilo yawama ku kapanyi bufuku buno nenyi?

Kabiji, talai, kwaishile muntu watelwa mba Yelusa, kabiji wajinga tangi wa shinagonga: kabiji aye waponene kumaulu a Yesu, ne kumusashijila amba aye ku nzubo kwanji:

Mambo aye wajingatu na yenka umo mwana wamukazhi, pepi wa myaka jikumi na ibiji, kabiji aye wajinga pepi mukufwa. Bino aye byoayile bantu kasa bamubumba aye.

Kabiji mwanamukazhi wajinga na lukatazho kwa mashi pa myaka jikumi na ibiji, ao wataile byonse bya mubwikalo bwanji ku bang'anga, nangwa byonkabyo aye kechi watambwilepo lubuko ne,

Waishile kunyuma yanji, ne kumukwata kwapela kivwalo kyanji: kabiji ponkapotu lukatazho lwanji kwa mashi lwapwile.

Kabiji Yesu waambile mba, Ing'anyi wajikukwata amiwa? Kimye bonse kyo bakaine, Petelo ne abo bajinga nanji ne kwamba mba, Nkambo, mabumba emubunga anweba ne kwimufina, kabiji ke mwambe mba, Ng'anyi wankwata amiwa?

...Yesu waambile mba, Muntu umo aye wajikunkwata amiwa: mambo Naumwa bulume bwafumamo mwi amiwa.

Kabiji mwanamukazhi byo amwene mba kechi wafiulwe ne, waishile nakuzakama, kabiji waponejile panshi kumeso anji, ne kumubuula ku meso a bantu bonse amba bamukwachile, kabiji ne byo abukilwe ponkapotu.

Kabiji aye waambile kwi aye amba, Mwanami wamukazhi, ikala namutende: lwitabilo lobe lwa lenga obewa kwikala wabukwa; yanga mumutende.

Kabiji byoakya aye . . . kyambilenga, kwajinga muluwe umo waishile kufuma ku nzubo ya mukulumpe wa shinagoga, kwamba mba aye Mwanobe wamukazhi wafwa; lukatazho kechi kwi Nkambo ne.

Bino kimye Yesu kyoauvwine kino, aye wamukumbwile aye, kwamba mba, Kuchina ne: ketekelaitu kwapwa, kabiji usa kwikalatu bulongo.

Kabiji kimye aye kyo aishile monka mu nzubo, aye kechi waswishishepo muntu wakutwela nanji ne, mpulushai Petelo, . . . Yakoba, ne Yoano, ne bashanji ne bainanji mwaana.

Kabiji bonse bajijile, . . . bamuzhijikile aye: kabiji aye waambile mba, Kujila ne; kechi wafwa ne, bino walaala.

Kabiji abo bamusekelenga kumunyemena, byo ayukile mba wafwa.

Bino aye wibalupwilemo bonse pangye, kabiji ne kumubika aye mumaboko, ne kumwita mwana, ne kwamba mba, Mwana, buuka.

Kabiji mupashi wanji waishile jibiji, kabiji aye waimene bulongo: kabiji wakambizhe kupana nyama yanji.

Kabiji bansemi yanji bajinga bakumya bingi: bino aye wibakambizhizhe abo amba kechi bafwainwa kubulapo muntu ne akya kyaubiwe.

²³ Pano twayai tulombe. Mutemwe Taata Wamwiulu, byo twatanga kikye Kyambo, twayuka mba abo bo bukine. Akye kyamwekele. Kechi ke mashimikilatu ao otwatanga atweba nangwa kampe bipewe byabyambo ne nangwa mabukutu akwabotu ne, bino akye kya kufuma mu Buuku ye twayuka kwikala Kyambo kya Lesa. Twaketekela mba kyamwekele. Twaketekela mba awe Yesu waubile kikye kintu kikatampe, abino byamwekele bibiji kuno, kya mwanamukazhi wajinga na lukatazho lwa kupita mashi, kabiji ne mwaana wafwa, twaketekela mba Aye ye Mwaana wakwa Lesa, amba Lesa wamusangwile Aye kufuma mu bafu ne kumwikajika Aye kwi atweba, bufuku buno, mu muntu wa Mupashi Wazhila.

²⁴ Kabiji twaketekela mba Aye uji muno ne atweba bufuku buno. Kabiji ne kuketekela mba Aye ujitu pamo keesha, leelo,

ne myaka yonse, lusa Lwanji lo lwa kufika ku bantu. Kabiji nobe bantu byo bafika kwi Aye, musango umo wapainwe kwi abo mu joja juba kisa kupewa kwi atweba pamo mujino juba. Kiswishai jibiji, Taata, pakuuba mba twikale na kushingwa manyi kwakatataka. Nobe Mulongo Shakarian waipwizhe mu bukishinka, ka kimye kapita, ne kwipuzha jibumba amba baketekele, twaipuzha jibiji mu Jizhina ja Yesu Kilishitu. Amena.

²⁵ Amiwa nasaka kwambatu ka kimye kacheche, kabiji akyo kisa kwikalatu bimye bicheche, mambo Nakeba kwibasenda bantu baji na bitupa bya milombelo kuno ne kwibalombelela. Kabiji ne kushapo kintu kikwabo bino ne kwibalombelela. Bino kasa tukyangye kulombelela bakolwa ne, twafwainwa kuleta bantu muyewa musango. Ke byubilo kimye kyonse biletatu mukumbu. Ke byubilo byo utwala kwi Lesa.

²⁶ Apo paji mwanamukazhi wakwachile ku kyakuvwala Kyanji, aye wabukilwe, na lukatazho lwa mashi. Mushilikale washipijile mu kilungi Kyanji kabiji ne kubikapo muchinya wa miba ku mutwe Wanji, kabiji kechi waumvwinepo bulume ne.

²⁷ Ke musango wakwiya kwenu. Ke byubilo byenu byobilenga. Kabiji abyo byokiji bufuku buno, mulunda mutemwe, ke kyubiwa na byubilo. Atweba twa, kabiji twaketekela mba tuji, mu Kyeenyi kya Yesu Kilishitu, bino byubilo byobe bileta mukumbu. Abwa bulume bwakumubiji buji pano, ne abwa bulume bwakwalulwa. Inge anweba mwakonsha kutatulatu, Lesa mwine usa kwingila byashala.

²⁸ Pano, awe mutwe ao Amiwa ye mbena kukeba kwambapo, pa mamineti acheche, ke: *Kushinikisha Kyambo Kyanji*. Pano akyo ke kintu kikatampe bingi, pa kulanguluka pa kyokyo: *Kushinikisha Kyambo Kyanji*.

²⁹ Pano Lesa wakonsha kushinikisha Kyambo Kyanji, bufuku buno, byonka byo Aye byoabile Aye kwi kishinikisha Akya. Kabiji ne Baibolo waamba mba, “Shininkishai bintu byonse. Kwachijijilai ku kyokya kyawama.”

³⁰ Pano anweba mwakuvwa, kafwapo kuzhinauka, kuvwapo kishimpi kyakala, “Kishinikishai akyo, Amiwa nsa kwikiketekela.” Bino akyo kichi kikwajijila kya bukiine ne. Bimye byavula Namwene bintu byavula byashinikishiwa, abyo byashinikishiwa na sayaasi, kabiji nangwa byonkabyo bantu kechi bekiswile ne.

³¹ Amiwa naambilenga na muntu, kuno kechi papita kimye kyabaya ne. Twaambilenga pa lubuko lwa Bulesa. Aye waabile mba, “Amiwa kechi nakonsha kwikitabila ne. Amiwa kechi natako muchima nangwa kyamweka byepi ne, nangwatu mwikishinikishe byepi, Amiwa kechi nekiketekela ne.” Kyawama, kyakiine, nangwatu mube byepi kuyewa muntu,

aye—aye wataika. Aye kechi wakonsha kuketekela ne. Kechi mujipo kintu kimo mwi aye, kya kuketekela ne.

³² Amiwa najinga na—na kyakupitamo kicheche muno, pepi nobe mulungu umo wapitapo, nobe anweba bonse byo mwayuka mba Amiwa—Amiwa ne kibinda. Kabiji byo Nabwelele kufuma ku mbung'eno yami, Najinga bokwe na kwipaya nyama. Kabiji panyuma Amiwa byo naendele mu Arizona, ke kyawama, Amiwa natemwa kwipaya nyama ikatampe, kabiji Amiwa natemwa kuya mukachi kabilengwa naleza ne kwibitala.

³³ Pano, Amiwa kechi ne mbazhi ne. Amiwa ngyatu na kwipaya nyama. Nanchi, Amiwa—Amiwa kechi natemwa konauna banyama ne, Amiwa—Amiwa kechi ndanguluka mba kijitu bulongo ne. Amiwa nalanguluka mba kijitu pamo bubi bwa kwipaya banyama, uvwe kechi ubena kwingijisha ne kuya mwaila yewa mwingilo ne, byo kyakonsha kwipaya kintu kingi. Naketekela mba kyatama. Atweba kechi twafwainwa kuuba kyokyo ne. Lesa witupele atweba ke kajo, na mambo ayeo mwingilo, kabiji kechi twafwainwa konauna ne. Bino pano abya byamba muzhilo byomwafwainwa kusenda, abyo ibyo. Kechi mwikyonaune ne.

³⁴ Kabiji Amiwa kokwa, kimye kyapwa kala kya byonsetu. Mabokwe epaya bang'ombe bavula. Kabiji Amiwa nayuka banjimi bavula mu kyalo. Kabiji kimye kyonse kyo bekala na kwipayang'ana, kika, batela amiwa mba, inge bokwe waiya pakachi ka mikoko. Mulunda nami umo, bufuku bukwabo, wataile pepi nobe sate-faivi aduledi madola, pa bufuku bumo, ku bokwe umo kwipaya mikoko yavula. Aye kwibatola, ne, namambo akyokyo, mabokwe ashala afwainwa kupana malipilo namambo a bubi bwanji. Kabiji nanchi Natolele bokwe, kabiji nanchi wajinga bokwe mukatampe, kabiji walepa buula-bwamaulu, kabiji wanema kinemenezhi pepi tuu-kintu kimo, nanchi kyajinga—kyajinga bokwe wawama wabaya.

³⁵ Kabiji nanchi Amiwa naile kufma mu kyalo kya Arizona, kuya ku Utah, mu bubinda. Kabiji nanchi Amiwa nabujilwe mba kwajinga bantu kokwa, amba awa muntu Amiwa yenailenga nanji mu bubinda, wajinga wa kafulumende, “Kabiji, na mambotu a buwame, kechi wakonsha kwambapo kintu nangwa kimo pa bupopweshi ne, kyajinga pe aye.” Waambile mba, “Aye wajinga bingi muntu wakosakana.”

Kabiji Naambile mba, kyawama, Nabuujileko muntu amba Amiwa mbena kuya nanji, Naambile mba, “Amiwa kechi nsakwikitongola ne.”

³⁶ Aye waambile mba, “Kechi mwambe mba ‘musapwishi ne.’ Inge wikyuba, kechi wafwainwa kuya na kwipaya nyama ne. Aye kechi wakonsha kukusenda ne.” Waambile mba, “Amiwa najinga nanji mu bubinda pa moba asatu, kabiji walaalanga nanji kila bufuku, wajile nanji pajuba pajuba, kabiji kechi

waambilepo amba, 'Mwabuka byepi lukeelo luno. Muji byepi? Mubena kukeba kintu kimo kya kuja? Komvwa masanyi.' Kafwako!" Waambile mba, "Pano kwambapo kintu nangwa kimo pa kikye ne."

Naambile mba, "Amiwa kechi nsakwamba kyambo ne." Nanchi Amiwa kechi namubuujile mba Amiwa kechi nakonsha kulomba ne, bino Natwajijiletu na kumubuula mba Amiwa... Kabiji Amiwa ndomba.

³⁷ Nanchi byo twafikile kokwa, muntu wajinga na byubilo bingi byashupa, kabiji kechi Nalangulukile mba waketekejilepo kintu kimo ne. Kabiji aye wajinga wataya mwananji muchechetu mafuku acheche kasa kikyanyaye kubiwa, mwana wajingatu kafuunga. Nanchi, atweba twaile nakwipaya nyama. Kabiji pa juba ja bubiji, mwanamulume ye Naile nanji mu bubinda wamubuujile aye, waambile mba Amiwa mbena kuya mu bubinda mu kyaalo kyonse. Nanchi kimye awa kibinda mukwabo, wajinga ne amiwa, kyoaile, twajinga kwalepa bingi mungye; akwa kotwakanyemene bobwe, poso byotwamukwachile mu mabwe, kabiji aye wamusendele. Kabiji nanchi twaikele popa na kupembelela kabwa kubwela. Kabiji awe muntu wang'ambijile mba, waambile mba, "Awa kibinda mukwabo, mulunda nobe, ubena kumbula mba wakonsha kuya na kunsola konse konse. Uji na mali avula bingi?" Waambile mba, "Naketekela mba kechi ke mwingilo wami ne."

Kabiji Naambile mba, "Ine," Naambile mba, "kechi kuji mali avula ne." Naambile mba, "Amiwa—Amiwa ntambula bukwasho bwa nyingijilo."

Kabiji aye waambile mba, "Oo, Namona." Aye waambile mba, "Kyawama, Naketekela mba kechi kuji mwingilo wami jibiji ne, bino," waambile mba, "obewa uji nakintu kyakosa kikutundaika nyi?"

Aye wikindoselemo mwi amiwa. Nalaile mba Amiwa kechi nakonsha ne, mwamona. Nanchi Naambile mba, ee, Naambile mba, "Ine, mwane. Amiwa ne musapwishi, mishonale."

Aye waambile mba, "Kika?"

Naambile mba, "Mishonale." Kabiji aye waimenetu ne nkutala pa mamineti acheche.

Naambile mba, "Bushe uji na luketekelo lwa Bumi muno nyi? Nga luketekelo lobe lo luka?"

Aye waambile mba, "Amiwa ne Jack Mormon."

Kabiji Naambile mba, "Kyo kika?"

Aye waambile mba, "Ke Jack Mormon."

Naambile mba, "Ng'anyi musango ye ajimo?"

Waambile mba, "Awa yenka uchipa ne kutoma kofi, ne kupepa fwanka."

Naambile mba, “Kyawama, lushimuno lwa bukishika lwawama ku mweo.”

³⁸ Kabiji pano aye waambile mba—aye waambile mba, “Nasaka kukwipuzhako kintu kimo.” Aye waambile mba, “Amiwa nabujilwe mba kipwilo kya Mormon kyokyonka kipwilo kya kiine kuno.” Aye waambile mba, “Obewa waketekela kyokyo?”

³⁹ Naambile mba, “Inge kyafika ku kipwilo, Naketekela mba kijitu pamo nobe bonsetu. Amiwa nayukatu Bukine bumo, kabiji awa ke Yesu Kilishitu.” Naambile mba, “Nayuka mba Aye wakine.”

⁴⁰ “Kyawama,” aye waambile mba, “Amiwa najinga na mwaana wasemwa bufuku bukwapo, mwana wafwijile munda.” Aye waambile mba, “Amiwa nabulwa mba awe mwaana, mambo wajinga mwana wafwijile munda, Lesa kechi wapemejilemo muya wabumi monka ne, amba Amiwa kech nafwainwa kumumona jibiji ne.” Aye waambile mba, “Mwalangulukapo byepi pa kyokyo?”

⁴¹ “Kyawama,” Amiwa naambile mba, “Anweba kechi musakwipuzha Jack Mormon, anweba kiine kechi mukoba ne. Akyo kyo kintu kimo kiine, anweba kechi mukekimona ne kikulutu aneba mwaikala mu Jack Mormon.” Kabiji aye waambile mba. . . Kyawama, aye wajikupachikanga, nanchi Namushijika pacheche, mwamona. Twajinga—twajinga na kimye kya kubwezha panyuma. Nanchi aye waambile mba—aye waambile mba. . . Naambile mba, “Lukatazho lwepi?”

Aye waambile mba, “Oo, Amiwa kechi nayuka ne.” Kabiji aye waambile mba, “Kyawama, walanguluka byepi?”

Naambile mba, “Nayuka byavula byawama. . .”

⁴² Amiwa kechi nayukile mba aye wajinga mu Mormon. Kabiji Amiwa najinga ke kyakila. . . Amiwa nayuka, kwikala mu Utah, ke kyakiine kyajinga, bino Amiwa. . . mambo bantu bavula kokwa ke ba Mormon, kuzhokoloka Salt Lake City. Akye kechi kyajinga Salt Lake City, nangwa byonkabyo. Nanchi Nalangulukile mba, “Kyawama, Najinga na Bamembala balunda bawama bingi, bajinga mu milaini ya milombelo, bantu bawama.”

⁴³ Kabiji Amiwa naambile mba, “Amiwa nasambakene muntu umo wawama bingi ao ke—ke mwina Mormon.” Kabiji aye waambile mba, kyawama, waambile mba. . . Naambile mba, “Amiwa kechi nayuka kufunjisha kwabo pa kyokyo ne, kabiji Amiwa kechi nakonsha kukeba kwambapo kintu kimo kyapusanako na lufunjisho lwabo ne, mambo abyo byo uji, kabiji Amiwa nanemeka kyonka kya kimye.” Kabiji Naambile mba, “Kyawama, ne kuketekela kyokyo?”

Aye waambile mba, “Ee, mwane, Amiwa byo kiji. Bino,” waambile mba, “Amiwa kechi ngikala mukyokyo ne.”

44 Naambile mba, “Kyawama, Naketekela mba Baibolo ifunjisha mba Lesa wayukile yewa mwaana, mamilyoni myaka yapita, kintendekesho kya ino ntanda kasa kikyangye kulengwa.” Naambile mba, “Lesu wabuujile Yelemya mba, ‘Kasa ukyangye kwimitwa munda mu bainobe, kasa ukyangye kufuma munda, Nakuyukile obewa, nakutokeshu, kabiji nakutongwejile jimo kwikala ngauzhi ku mikoka ya bantu.’” Naambile mba, “Abyo ibyo byo Aye wayukile pa kikyeye, mwamona.”

Aye waambile mba, “Kyawama,” aye waambile mba, “nemusanchila.”

45 Aye watatwile kwenda mushi ya katumbatumba. Kabiji nanchi wasambakene na iwe mulongo mukwabo, kabiji aye waambile mba, “Kika kyo mwabujila kumbula mba awa muntu wajinga musapwishi?” Kabiji nanchi atweba . . . Aye waambile kwi aye pacheche kabiji watatwile ku mubuula pa mpwijilo.

46 Pano, Mormons waketekela bungauzhi. Amiwa kechi . . . kechi nakonsha kwikala muno ne, bino abo—bino abo baketekela mu—mu bungauzhi. Bino, nanchi, kampepo Amiwa mbena kwamba kufuma mu sukuulu, bino Amiwa . . . Ee. Ee. Bino, nangwa byonkabyo, baketekela.

Kabiji aye waamba mba, wabwelele kwi amiwa, waambile mba, “Nayuka mba obewa wi ngauzhi.”

Naambile mba, “Ine, mwane.” Naambile mba, “Amiwa . . . Aye Nkambo wamweshu bintu bicheche kumweka.”

47 Kabiji wafuminepo, ponkapotu, waambile mba, “Twayai tuye.” Kabiji watwelele mu motoka wanyi, ne kuya ku . . . muzhi wanyi mucheche mo aikele. Mu bimye bicheche, wajinga wazhimang’anatu. Atweba twajishishenga bakabwa, mukwibatwala mububinda bukwapo panyuma yakajo ka pachaille. Kabiji kimye twaubile byobyo, kika, aye watwelele mumotoka nekuya.

48 Mu bimye bicheche, mwanamulume umweka-bulongo mwanyike wabwelele, pepi nobe wa myaka sebetiini, mwine wakiine wazhijikwa-mwekelo Mwinakilishitu ke muntu watekanya. Aye waambile, “Awe ke mulungo.” Waambile mba, “Aye kechi mwina Jack Mormon ne. Aye ye mwine Mormon.”

Naambile mba, “Muji byepi, mwaana?”

Kabiji aye waambile mba, “Nayuka, mba mulongo wami wambula, mba obewa wi ngauzhi.”

Naambile mba, “Ine, mwane.” Naambile mba, “Kechi amiwa ne ngauzhi ne.” Naambile mba, “Aye Nkambo wamweshu bintu bikeya kufikizhiwa.”

49 Aye waambile mba, “Amiwa njina kundoza kukuboko kwami kwakilujo pano, Amiwa nakulinga kutanwa pa tebulo

wakutumbwilapo.” Aye waambile mba, “Bino mulongo wami wambujile kikye. Kabiji Naambile mba, ‘Inge byokiji, Amiwa kechi mbena kukeba kutumbula ne.’” Aye wantajile ku meso ami, bukishinka, wakishinka, mwekelo ya bukishinka, waambile mba, “Wabika maboko obe pe amiwa. Inge bibye bintu, Amiwa kechi nkakeba kutumbula ne.” Aye waile ku nzubo kasa aji bulongo.

⁵⁰ Awe mulongo, mulunda nami Mwinakilishitu, wajinga mububinda pamo ne amiwa, kufuma ku Phoenix. Aye waambile kwi amiwa, waambile mba . . . Bamo bamubabo bansongwalume baikala muno pa kino kimye. Umo mwiabo Nayuka mba uji muno. Twaile ku nzubo. Aye waambile mba, “Mulongo Branham, inge Nkambo wakonsha ku kumwesa kimwesho kabiji lekai bena Mormon kikeya kumweka, amba akyo kyo kikoba, mambo abo bebena kutajisha konka.”

⁵¹ Nanchi, Nalombele kabiji Nalombele. Kabiji pa kubwela mujishinda, Naishilenga, pa Kimo kyalondelapo, Pamulungu, pepi nobe teni koloko, Naimene mu kibamba, panyuma ya kipwilo alwa lukeelo, kabiji natajilenga.

⁵² Kabiji Namwene kubyasha kwa kyeya kyasama, nangwa musango umu wa kubyasha kyeya kyasama. Kabiji Namwene bonkwe wajinga mukinchi, kabiji—kabiji wajinga wakepesha bingi pakuuba mba ndoze. Amiwa kechi na mukebelenga ne. Kabiji kwajinga muntu mukwabo wilozele, kabiji, byo baubile, bamulozele na buta bukatampe. Bwalozekele bonkwe panshi. Amiwa kechi nasanchile mu—mu—mu jishinda mokyauvikilwemo ne.

⁵³ Byo Nafikile ku Phoenix, Nabujile Mulongo Dawson kyokyo, kabiji ne Mulongo Mosley. Nayuka mba uji muno. Namumwene juba jikwabo, kuntu kumo muno. Kabiji wailenga ne amiwa, aye ne bakazhi banji. Kabiji Naambile mba, “Mwamona ne kumona, akyo ABYO BYOBYA AMBA AYE NKAMBO. Kikamweka muyewa musango.”

⁵⁴ Mafuku atweba o twapembelejile, foolo nangwa faivi mafuku, atweba twajinga mububinda, nangwa moba. Kechi javujisha anweba kwikala na kichi kya bokwe mu bufuku. Kyamweka nobe, kwiya kunzubo, baalwile bakabwa bataika, awe kibinda, awe nsongwalume wa Mormon. Kabiji ke—ke kutana mba bubokwe, nangwa kutana bokwe ne kabwa, nangwa byonkabyo, kabiji ne kunyemena monka mukichi. Kabiji pa teni koloko bufuku baishile, ne kwitusenda atweba kufuma pa mwanya. Twaile pangye kokwa, kabiji akwa kwajinga bokwe umu mukichi. Kubyasha kwa kyeya, Mulongo Mosley wamulozele aye na pepi a .44 muzhinga, nobe ao walajile bokwe kichika mubipivwa bibiji. Kabiji abyo byokyajinga, monka mo kyaambijilwe.

Aja juba jalondejilepo, Amiwa nasambakene mukulumpe wakusunga banyama mu kyalo, mukwabo Jack Mormon. Wasendele booba bansongwalume pamo, na kwibatangijila kubwela ku nzubo kwi Kilishitu.

Nemubula mba, Aye ujitu pamo keesha, leelo, ne myaka yonse. Lesa ushinikisha Kyambo Kyanji kwikala byonkabyo.

Anweba mwaumvwapo kala bantu kebambe mba, “Kumona kokuketekela.” Akyo kechi kyakine ne. Bantu bavula bamona kabiji kechi bekiketekela ne.

⁵⁵ Moba Yesu byo ajinga panopantanda, kika kyo babujile ku muyuka Aye, amba Aye wajinga kyokya Kyambo kya Lesa kyasololwa? Kika bantu kyo babujile kumuyuka mba Mosesa waambile mba, “Aye Yehoba Lesa wenu ukemwimenya ngauzhi uji pamo ne amiwa”? Kabiji Aye wafikizha Kyambo kyonse kyaamba Baibolo mba Aye ukekyuba, bino kechi bekiswile ne.

⁵⁶ Bino Lesa, mu nkulo iji yonse, washiniikisha Kyambo Kyanji amba kyakine. Aye kimye kyonse ushinikisha Kyambo Kyanji. Nanchi baamba kimye kimo, mba, “Kumona kokuketekela.” Kechi byo kiji ne. Bino twayuka mba Lesa wiya na kushinikisha Kyambo Kyanji mu nkulo yonse.

⁵⁷ Twayuka mba Aye wikishinikishe kwi Adama ne Eva, byonka byo Aambile mba, “Aja juba jo mukajako, aja juba kine ukafwa.” Twafwainwa kuswa kyokyo, akyo bo bukine. Twaketekela kyokyo, mambo Aye wikishiniikisha kwi atweba, kabiji twayuka mba kya bukine.

⁵⁸ Pano tusakutolatu bifulo bimo Lesa byo ashinikishe Kyambo Kyanji. Twayai tutole, nobe kyakumwenako, mu moba akwa—akwa Nowa. Lesa waambile kwi Nowa aya mbila yabujilwe kushininwa kubasayasi ne kwitabilwa. Kafwako nangwa umo wakonsheshe kuketekela ne. Ke kwanokelepo pa ntanda ne. Mwaila basayasi!

⁵⁹ Kampepo bajinga nkulo ikatampe ya kisayasi kukila byo tuji pa kino kimye, mambo bashimikile pilamenda ne bitungutungu, ne bikwabotu, mu oa moba, abyo byotwakonsha kubula kushimika atweba kino kimye. Bayujile binga na bulume, nobe na musango wa bulume bwa kumubiji, kampepo nobe atomiki nangwa kintu kikwabo, amba abo bakonsha kushinka aya mipaka ikantampe, abyo byotwabujilwe atweba leelo jino. Bino baubile bintu bikatampe bya kisayasi. Abo bajinga na bintu byakukonsha kuba embamu mubiji, ku mulenga kwikala bimye byavula myaka aduledi. Atweba twataya abwa busendwe bwabyakulenga lenga.

⁶⁰ Yesu waambile mba, “Byonka byo kyajinga mu moba akwa Nowa, nanchi byo byo kikekala ne pakwiya kwa Mwaana muntu.” Kabiji twayuka mba tukatwela mu nkulo ikwabo ikatampe ya masayansi.

⁶¹ Kabiji pano mbila ya kwa Nowa yajinga yapusenamo na lwitabilo lwa mujoja juba, mu kipwilo, kabiji kyajinga kyapusanako bingi na kupesapesa kwa masayasi. Bino Lesa washiniikishe Kyambo Kyanji amba kya bukine. Lesa washinikishe mba awa ngauzhi byoambile bya bukine.

⁶² Kabiji tusakusenda mukwabo pa kakimye kacheche. Abulahama wajinga ngauzhi mukwabo wa Nkambo, akya Kyambo kokyayile. Kabiji wa mubuujiile, kimye kyo ajinga myaka sebete-faivi, kabiji Sala wajinga na myaka sikisite-faivi, amba ukekala na mwaana mwi Sala. Bino, akya kyajinga kya kukumya bingi ku wabula kwitabila. Mwakonsha kulanguluka, leelo, amba kintu kimo kibena kumwaka ne mu jino juba, na byonse byauble sayasi byakupesapesa, kabiji byonsetu bya kweseka-byamakyumbu byabana byakwamba, ne bintu bikwabotu? Bino awe mwanamukazhi mukote, pano wa myaka sikisite-faivi, kabiji ne mwanamulume mukote wa myaka sebete-faivi, pakuuba Kyambo kya Nkambo kyaishile kwi Abulahama kabiji wamubujile mba abye bikamweka. Kabiji Abulahama waketekejile Lesa. Pano, nangwa Lesa wa ambile byepi, kabiji kyajinga kyakine byepi, Abulahama waketekejile byaambile Lesa, pakuuba mba kikale byonkabyo. Pano monai awa muntu byo aesekelwe, na lushimuno lwanji, amba aye waketekejile.

⁶³ Awa muntu yenka umo walengele abya byakwisolola, amba waketekejile Lesa, ke muntu nobe anweba, baikala kuno bufuku buno. Atweba twaketekela Lesa. Twafwainwa kuketekela Kyambo Kyanji kya Bukine. Kabiji Aye ukekishinikisha, amba Kya Bukine, inge twakonsha kwikiketekelatu.

⁶⁴ Pano talai awa mukika wajinga ne Abulahama. Kintu kitanshi kyajinga myaka yanji, sebete-faivi, kabiji Sala byo ajinga sikisite-faivi. Aye wajinga wapitaila kala mwaila lupimpu lwa bumi, kupitaila pakusema. Kechi pajipo luzhinauko ne wafwajilwe kwimana, myaka yavula kunyuma. Aye waikale nanji nobe mukazhi. Kyajinga yenga yanji-kichika, kampepo wa mutwajile kimye kyo ajinga nsongwakazhi mu bwanyike bwanji, kabiji wa musongwele. Kabiji aye kechi wajinga na baana ne. Aye wajinga ng'umba. Kabiji pano twatana kuuba mba, pakuba kikye, aye wi abenye aye mwine ku bantu bonse babujile kwikiketekela, pakuuba mba kifikizhiwe.

⁶⁵ Amiwa kechi natazha mu kwamba mba obewa wi abanyako obewa mwine ku bantu ne. Pakuuba wafwainwa kwiabanya obewa mwine kufuma ku bumbulwa lwitabilo, ne kufumako ku kyokyo. Umvwe bantu baamba mba, "Aa, abya bintu kechi bimweka ne! Aja ke jibumba ja bantu besamba na bapashi! Kechi kujipo kintu kyamusango yewo ne," shinka matwi obe ne kuya kwalepa. Kechi mwakonsha kutako muchima ku kikye ne.

⁶⁶ Aye Baibolo waamba mba "Abulahama kechi wazhinaukile

mulaye wakwa Lesa ne, kupichila mu kubula lwitabilo; bino wajinga wakosa, kasa atakaika Lesa.” Jizhina janji japiwilwe kufuma kwi Abulama kuya kwi Abulahama, kwalulwa kwa jizhina kwalengele jizhina janji, “shanja mikoka ya bantu.” Mwakonsha kulanguluka mwanamulume kwikala na mukazhi wani, mutemwe wani, amba aye waikele nanji pa yonse ye myaka, kabiji pano kuntu kumo mu myaka eite, kabiji mukazhaji sebete, kabiji nangwa byonkabyo kwakubula mwaana nangwa luketekelo lumo lwa mwaana ne, bino aye waambile mba wajinga “shanja kyaalo.” Mwakonsha kulanguluka akwa kwendelekwa kwakupitamo ku bakwabo bantu kwabyakwamba, “Shaja mikoka ya bantu, pano baanga baana bo uji nabo pa kino kimye?” Kabiji byonse bya kwendelekwa aye byoapichilemo!

⁶⁷ Bino Abulahama aye kechi wakokelepo nangwa pachechetu ne, na byakubula kwitabila. Aye waketekejile mba Lesa wakonsha kwi kyuuba Aye akya kyo alaile, amba Lesa wakonsha kushinikisha Kyambo Kyanji, nangwatu kikale bimye binga. Bino mukifulo kya kwikala wakokelela kimye kyonse, nobe byonka byo twafwainwa kuuba, aye wailengatu nakukosa pa kimye kyonse. “Inge kyabula kumweka leelo, keesha kikekala ke kyakukumya kikatampe, mambo ke juba jimo jakoma.” Awa wajinga Lesa, awa wajinga Lesa mwi Abulahama, mambo aye wayukile mba Lesa washinikishe Byambo Byanji byonse kwikala byonkabyo.

Inge Aye baana banji bakonsha kutolapo Kyambo Kyanji, nanchi Aye wakonsha Kwikishiniikisha kwi obewa! Amba ajo jojonka jishinda Aye jo akonsha kushiniikisha Kyambo Kyanji.

Aye kechi wi Kishinikisha ku babula lwitabilo ne. Abo kechi bakonsha kushinikishiwa ne; abo ke babula kwitabila. Bino, Kechi kubabula kwitabila ne. Kechi kya babula kwitabila ne.

⁶⁸ Kiji kwi aye waketekela. Kabiji inge Aye wakonsha kutana muntu umo wakonsha kuketekela Kyambo Kyanji, Aye ukashinikisha Kyambo Kyanji kwi obewa. Kabiji bimye bimo misongo ne bintu bikwabo bimweka kwi atweba byobyaya, amba Lesa wakonsha kwishinikisha Ayemwine.

Bushe mwavuluka yewa muntu mpofu Yesu ye atainepo? Abo baambile mba, “Ing’anyi walengele mambo, aye nangwa bashanji, bainanji?”

⁶⁹ Aye waambile mba, “Mu ao mambo, nangwa umo ne, kana mba mingilo yakwa Lesa yubiwe iyukanyikwe.” Monai, kyamwekele ku nsongwalume pakuuba mba Yesu ekale watumbijikwa. Kimye kimo misongo kechi ke jifingo ne, ke jipesho, amba atweba tulamachile kulwitabilo konka ne kutela abya bintu byabulako, nobe kobiji. Lesa waambile byobyaya, kabiji Aye ukekishinikisha nanchi inge obewa kechi ukakokelela ne mulweseko.

⁷⁰ Aye wakonsheshe kushiniikisha Yoba, kimye kimo, amba kechi wakonsha kumufinga Aye ku meso Anji ne. Talai pa lweseko Yoba lo apichilemo. Bino ku mibanga ya lufu, aye waambile mba, “Aye Nkambo wampele, aye Nkambo wangangata, jitotwe Jizhina ja Nkambo!” Aye kiine wikiketekejile. Lesa washinikishe Kyambo Kyanji kwi Yoba. Aye wikishinikishe kwi Abulahama. Aye wikishinikishe byoabyo.

⁷¹ Kabiji Aye wikishinikishe kwi Mosesa. Kabiji kimye Mosesa, kimye lukatazho byo lwajinga bingi pe aye, Mosesa wajinga nakyo mu milanguluko yanji, amba kampe, kwikala mupokolweshi, amba kampe bainanji bamubujile aye amba wasemekelwe mwaana walumbuluka. Aye—aye wajinga wamwingilo wamulaminenga aye mukupango kya Felo, kwabula kuzhinauka aye wamubijile aye, “Mwaana, atweba twalomba amba tupokololwe, kabiji atweba twaketekela mba obewa yobe mwaana ao Lesa ye akengijisha kwitupokolola.” Kabiji nanchi kimye aye . . .

⁷² Monai, waishile kabiji wafwajilwe kwikala awa—awa mwaana wamukazhi wakwa Felo, kabiji twatana kuuba mba aye wajinga swanyi wakuwana jitanda. Kika, kwakubula kuzhinauka kyajinga mumilanguluko yabo nanchi, amba aye wakonsheshe kwikala Felo walondejilepo, “Kabiji abyo aye byo akapololola bantu, kupichila mu kwikala Felo mukwabo.” Bino Lesa wajinga na . . . Inge akya kyajinga byoabyo, nishi aye nge wikyubile kupichila mu bingijisho, kupichila mu—mu—mu byubilo bya mapolitikisi. Bino Lesa kechi kimye kyonse wingila byoabyo ne.

⁷³ Lesa uji na mashinda Anji a kwingijilamo, kabiji Aye waambile mba Aye “ukebalupulamo.” Aye wabuujile Abulahama, “Pakupitapo myaka foolo aduledi,” Aye wakonsha “kwibalupulamo, na kuboko kwa bulume,” Aye wakonsha “kumweshia biyukilo ne bya kukumya.” Nanchi aye kechi wakonsha kwikyuba muyewa musango ne, nanchi Abula- . . . Twatana kuuba mba Abulahama waitabijile Lesa, kabiji awe ye Mosesa pano waketekela Lesa.

⁷⁴ Kabiji Mosesa watajilenga pangye kwingijisha kipeze kimo kyatajilengamo Felo, aye wamwene bantu bamotu. Awa Felo watajile pe abo, nobe, “Ke bantu bafingwa, ke bantu babula kintu ne kanatu baji nabyakisangajimbwe, bya Lesa, kabiji bamo basha Lesa kuntu kumo amba abo kechi bayukilepo kintu kimo ne; kifulo kimo kibula kumweka akyo kyobalombako, amba kechi pajipo kintu nangwa kimo pa kyokyo ne. Ke jibumbatu ja bantu banji na kisangajimbwe. Kabiji bajinga jibumba ja bazha. Kabiji Lesa wabo wibaswishishe kwikala bazha, kushinikisha mba Aye kechi wajinga Lesa ne.”

⁷⁵ Kabiji monka mukachi ka bintu byonse, Aye waimikilenga awa yenka muntu. Lesa uba bintu mujishinda japusanako,

monka mukachi kabo. Kechi wafunda byambo bya lesa ne, kechi mufunjishi ne, kechi pulisiti ne, kechi umo wa mu bantu babo bazhila ne; bino nobe muntutu, wasemwa pa mwingilo. Kabiji Lesa wamwichile kwikala ngauzhi Wanji, ne kumutuma konkakwa. Kabiji kafwako kintu kyajinga mukuboko kwanji kana konto yakichi yakutalang'ana na bashilika, akya kyonka kyakushijilako ntanda yonse. Bino na yewa mukombo mu kuboko kwanji, nobe byonka Lesa byo amubuujiile mba akwate mukombo mu kuboko kwanji kabiji amba ukapokolola Isalela, kabiji waile panshi ne kwikyuba mambo Lesa wikilaile. Pano aye ukekyuba byepi? “Amiwa kekala nenu.”

Aye waambile mba, “Mweshepo lukumo Lwenu, Nkambo. Amiwa ng'amba bitende. Amiwa kechi nakonsha kwamba bulongo ne. Kabiji Ami. . .” Aye wajinga na byakusolelamo milyoni.

⁷⁶ Bino Aye waambile mba, “Amiwa kekala ne anweba.” Kabiji abyo byo byonse byo kyaubilwe. Aye waile, kusenda Kyambo kya Lesa. Nangwatu kikale kyabulemo byepi awo mwingilo wamweka, Mosesa watwajijile kuketekela Lesa. Kabiji Lesa washinikishe Kyambo Kyanji, kupichila mwi Mosesa, kwikala kya bukine. Mambo, kwakubula kutako muchima na byamwekele, Mosesa waikele na Kyambo. Mu kimye kya lwendo. . .

⁷⁷ Lesa wibambijile mba, monka mu Ijipita, ne abo, amba Aye ukebapokolola, “Mu ntanda ya mulaye, ntanda yawama, yayulamo mukaka ne buki.” Kabiji kiine byo kyajinga. Abo kechi bayukile mba uji konka ne, bino Aye waambile mba, “Kiji konka, kabiji Amiwa na mupabo. Ke kyenu kala, yaingatatu nakwikitambula!”

⁷⁸ Kabiji mungyetu, kimye bavula ba mwiabo kyo balupukile, na kuzha mu Mupashi, kimye Milyama kyo aimbilenga kisekeseke; kuja manna kufuma Mwiulu; kuteleka kwi Mosesa kwimba mu Mupashi; na kumona bya kukumya ne biyukilo kasa bibena kubiwa. Pakuuba byo kyaishile na kubekya, kuketekela Kyambo kyonse kya Lesa, mulaye yense, bakakelwe.

Babijitu ba mwi abo bekiketekejile, awa wajinga Yoshiwa ne Kaleba. Kabiji abo baletele kyakushinikisha amba aya ntanda yawama.

⁷⁹ Bino, kyajinga kimiko, akya kyajinga kimiko kyabo. Mambo, baambile mba, “Atweba kechi twakonsha kwangata yoya ntanda ne, mambo mizhi yabo yavimbijilwe, na—na—na bantu babo. Kechi ngubilo yabo ne, bino abo—abo bantu babo ke bazama. Kika, twamwekelenga nobe batete, pakwimana kulubaji lwabo.”

⁸⁰ Yoshiwa ne Kaleba baambile mba, “Twakonsha kwikitambula.” Kika? Lesa wibapele ayo kwiabo, nangwa bekale bakatampe byepi babilo byobajinga. Akya kimiko kechi kyajinga kintu kwi abo ne. Lesa waambile byoabyo! Kabiji Lesa

wikishinikishe kwi abo. Kabiji baile na kutambula ntanda, monka Lesa mo ambijile mba byo bakoba. Aye wikishinikishe kwi abo.

⁸¹ Pano, byo bafikile mu ng'ondo wa Mulombola, kimye meema ayujile ne mumitumba, ne mumisanza, ne bikwabotu, kabiji kyamwekele nobe Lesa wajinga mukulumpe wabashilikale wayanda, mu kutangijila nzhita Yanji kufikatu ne pa kifulo kimo, Aye wibazhachishe na ntanda yamulaye. Kabiji mukyokankya kimye Aye kyo abasendele abo, wayilenga nakwibatangijila abo, kyajinga ng'ondo wakatazha mumwaka. Ke ng'ondo awo Yondano poayujilenga ne kubitulu, ne kuyuzha mumajimi abo. Kika, inge abo bailenga nabo kokwa, inge kyajinga kimye kyakisalo, kimye kyakuba mba baabuka bushiya. Bino Aye wapembejile poso meema afike pazhika. Aye ukeba kumwesa mba Ye Lesa. Aye ukeba kushiniikisha Kyambo Kyanji, nangwa kikale byepi.

⁸² Kechi oene mambo ne nangwa ba dokotala baambile mba, "Obewa ubena kufwa na kaasa." Abyo byo byonka muntu byo ayuka. Kampepo meema azhika kwi anweba bamo, bufuku buno. Bino, vulukai, Lesa walaille mulaye. Lesa ulama Kyambo Kyanji, kabiji Lesa ushinikisha Kyambo Kyanji. Bo Bukine.

⁸³ Aye wapempelela poso meema ayule ne monsetu mubujimba, poso abo pobaibijile ne mitwe yabo, kabiji ne bikwabotu, kabiji Aye washikwile jishinda. Aye waileko palutwe yabo ne kulenga jishinda.

⁸⁴ Musango mobaijilenga kokwa, ku Yeliko, kimye byonse po byashikilwe? Yoshiwa wakuminyenga. Aye wayukile mba Lesa wamutangijile kufika pano, tampulo yalondelapo iji kulubaji lwa kwa Lesa.

⁸⁵ Juba jimo, kimye kyoaendelenga nakuzhokoloka, mukumona bibumba, aye wamwene Muntu kasa aimana napoko Yanji yatwa. Kabiji wasomwene poko yanji ne kuya na kusambakana awa Muntu, aye waambile mba, "Yenu Bang'anyi? Obewa uji ne atweba nangwa Obewa wi wa mubalwanyani betu?"

⁸⁶ Aye waambile mba, "Amiwa ne Kapiteni wa nzhita yakwa Nkambo." Kabiji Aye wamubujile byakuuba. Musango aye mwakujijisha ntolopita ke kukundula bibumba, amba abo bakanyemesha makalaki kuzhokoloka? Ng'anyi kintu kyakebelwe kubiwa na ntolopita?

⁸⁷ Lesa wingijisha awa musango wapela byonkabya. Byonkabyo, monka mokyapelela kubiwa, mokilengela Lesa kwi amiwa. Atweba kimye kyonse tubena kukeba kutanapo kintu kimo kikatampe, kisakubiwa, kabiji Lesa...nobe kabungwe kakantampe ako kakasenda byonsetu bikatampe bintu ne kwibifumyamo. Inge, Lesa wasenda muntu wapeelatu, muntu umotu Aye ye akonsha kulama mu maboko Anji, kabiji Aye

ukashinikisha Kyambo kyonse kyo Ambile, kupichila mwi Akyo. Kisenda jishinda japeela!

⁸⁸ “Mvumyai ntolopita.” Kechi mwakonsha kupoya kibumba ne, bino, “Mvumyaitu ntolopita, kabiji ne bibumba bikapona panshi. Akwa kuvumya kwa ntolopita kukakonkosha bibumba ne kwibiponesha panshi.” Kyaikala kyabulamo maana ku milanguluko ya buntushi! Bino Lesa washinikishe Kyambo Kyanji kyajinga kya kine, mambo bibumba byaponene panshi, kikwabo peulu ya kikwabo. Abo bailetu kulutwe kabiji batambwile muzhi.

⁸⁹ Oo, Lesa ukeba kwishinikisha Ayemwine kwikala Lesa! Yoshiwa wayukile kyokyo. Juba jimo, kabiji kimye aye kyoaimene byobya, kimo kyamubitambabayeshi kyamwekele, pangye ya lufu, kuzhikwa, ne lusanguko lwa Yesu Kilishitu. Kimye mulwany. . . Aye kyo ebaponene, kabiji mazhita apusanapusana ajinga mu mitumba. Aye wapumine panshi, ne juba jailenga na kuzhika. Oo, ami, kyajinga kimye kyakwa Yoshiwa Wabulume bonse!

⁹⁰ Vulukai, aye walwijile yoya ntanda mubyonse, kwakubula kwikala na kipatela, aye manase, awa wakukwasha-mutanshi wajibumba, nangwa wajinga nakilonda awa muntu. Mbulai kintu kimo kyakonsha kukila kyokyo. Ee, mwane. Aye kechi wajingapo na bipatela ne, kafwako bamanase ne, kabiji kechi watailepo muntu umo ne, kikulutu abo baendele mu kyaswa muchima ne Kyambo kya Nkambo. Lesa washinikishe mba Wajinga nabo. Abyo ibyo. Pano monai.

⁹¹ Kabiji twatana mba Yoshiwa wayukile, inge bufuku bwaiya, abo balajilenga nakuzhokoloka ne kwikala umo ne mukwabo, kabiji—kabiji ne kwiya pamo ne kulenga jibumba jikantampe jabashilikale, kabiji aye waikelenga nabo nakimye kyakuseka poso ne juba jalondelapo. Aye kechi wayukile byakuuba ne, nanchi watajile kwi Lesa. Aye wakebelenga bukwasho, kabiji wakebelenga aja juba kwimana nzoo. Nanchi aye wakambizhizhetu juba kwimana poso, kabiji ne. . . nekwaamba mba “byonka bimana ng’ondo mumusanza wa Ajalon,” kechi kwenda ne poso aye byo ekikambizhe. Kabiji ng’ondo ne juba baiketletu pepi nobe maawala tweti-foolo, kimye Yoshiwa kyo alwishishe nkondo kabiji washijile mulwany, mambo aye wajingatu monka mu mondonda ya mwingilo. Wajinga na sambu ya kwikyuba, mambo wakokejilenga mukambizho wakwa Lesa.

⁹² Kabiji kikulutu uji mu ndonda ya mwingilo, kulama Kyambo kya Lesa, na kuuba byonka Aye byo akubujile mba ube, kuya kulutwe na mikambizho yakwa Lesa, uji na luusa lwa kwamba ku yewa mutumba, “Amba enda!”

⁹³ Lesa ulama Kyambo Kyanji. “Inge waambila yiwe mutumba mba, ‘Enda,’ ne kuzhinauka mu muchima obe ne, pakuuba waketekela mba mba kyo waamba kisa kufikizhiwa, wakonsha

kwikala nakyo kyo waamba.” Yesu waambile kyokyo, mu Mako Wazhila 11:22. Abo bo Bukine. Nayuka mba abo bo Bukine. Ke Kyambo kya Lesa, kabiji akya kishinikisha mba kya Bukine. Atweba tuji na moyo bimye bimo. Twafika pakifulo, tuji na moyo Aye kechi wakonsha kulama kyokya Kyambo ne. Aye ukalama kyokya Kyambo. Aye waambile mba Ukekyuba. Bino, twatana mba akyo kyakine. Aye wikishinikishe.

⁹⁴ Isaya waawile, kimye kimo, akyo kintu kikyangye kumwekapo ne; kikyangye kubiwapo kala, kabiji kechi kyaubiwapo ne. Aye waambile mba, “Kisungu ukemita.” Mwakonsha kulanguluka mba mwanamukazhi, wabula kuyuka mwanamulume, ukekala na mwaana nyi? Isaya waambile mba, “Kisungu ukemita.”

Kabiji Lesa walengele kisungu kwimita, pa kushinikisha Kyambo Kyanji kya bukine. Aye washinikishe Kyambo Kyanji, mambo kisungu waimichile ne kusema Mwaana.

⁹⁵ Pano, akya Kyambo kya alukile ke muntu, monai byo Kyaubile. Kimye awa Mwaana byo aishile, Aye wajinga Kyambo Ayemwine. “Muntendekelo mwajinga Kyambo, ne akya Kyambo kyajinga na Lesa, kabiji akya Kyambo kyajinga Lesa. Kabiji akya Kyambo kya alwilwe ke muntu ne kwikala waikelenga muno mwetu.”

⁹⁶ Aye wajinga kyokya Kyambo kyumi. Aye washinikishe mba Wajinga kyokya Kyambo kyumi. Aye waambile ku booba bafunjishi ba joja juba, “Ng’anyi wakonsha kuzhachisha Amiwa na ubi?” *Bubi* ke “kubula luketekelo.” “Ing’anyi wakonsha Nkumbuula mba Amiwa ne wabula kwitabila? Kyambo kyonse kyanembwa pe Amiwa, kyafikizhiwa.” Bya byatongolwa byapelako bitanu na bibiji byaambilwe pe Aye pa bumi bwanji byafikizhiwe muma awaala apelako atanu na abiji, apa pamusalabu. Bintu byonse bya nembelwe pe Aye, bya fikizhiwe, mambo Aye wajinga Kyambo. Aye washinikishe mba Wajinga, byo kyajinga. Aye wabukile bakolwa. Wasangwile bafu. Aye washijile lufu, kalunga kabafu, kabiji ne kilende. Aye washinikishe mba Wajinga Kyambo.

Monai lulwe lukatazho ku nzubo ya kwa Jailosi. Aye wajinga... Aye wibabujile bukine. Twamumona Aye byo Aabukile kalunga. Aye wiya mukachi.

⁹⁷ Kwajinga mwanamukzhi mucheche popa pakatumbatumba, aye wataile mali avula ku bang’anga bamichi. Kechi pajipo luzhinauko ne, bang’anga bamichi bakonsheshe kuuba byonse byo bayukile kuuba, pakuuba mba mwanamukazhi ekale bulongo; kyakiine bang’anga bamichi babena Hebelu, kabiji awa wajinga mwanamukazhi mwina Hebelu, nanchi abo baubile byonsetu byobakonsheshe kukwasha nyenga yabo. Nangwa byonkabyo, kechi bajinga na kintu kimo kya kukanya ao mashi ne, akyo kyajinga, kampepo, akya kimye kyakuleka kusema

kabiji mashi apichilengatu nakuyatu poso aye. . . kintu kicheche kyajinga kyakoka bingi aye wakankelwenga nekuya kuji konse. Kabiji aye wauvwine pe Yesu. Kabiji kimye aye kyoamwene kabwato kakacheche kwipi kukitulu, aye waile konka ne kutanwa konka.

⁹⁸ Akwa kwajinga bavula bakumukanya baimeneko. Kabiji Aye kechi wakasuluka nabyakumukanya byalelo ne. Inge abo bayukile Byoajinga Aye, abo kechi bakonsheshe kwikala Aye wakumukatazha ne. Bino bajinga bakajimbulushi Banji mambo kechi bayukile mba Aye Yeng'anyi ne.

Kabiji abyobyoby kiji na Mbila leelo, bavula bingi banabalume bawama ne banabakazhi bajimbulula Kikye mambo kechi bayuka Byokiji ne.

⁹⁹ Yesu waambile mba, “Inge mwamuyukile Mosesa, umvwe mwangyuka ne Amiwa. Mosesa watongwelenga Amiwa. Bavula bantu bakatampe bakabijilenga kumona jino juba. Inge Nabula kuuba mingilo ya Ba Taata, nanchi kungitabila Amiwa ne. Amiwa njina kamonyi mukatampe,” Aye waambile mba, “kukila payewa Yoano, mambo mingilo yo Nguba, ya kushinikisha mba Bataata baji ne Amiwa.” Aye wajinga na mingilo ikatampe, mambo Aye wajinga Wayukanyikilwe. Yoano wayukanyikilwe ne aye pamo, nobe jiji ja umo ubijika mungyetu. Bino byo Aishile, Aye wajinga ngauzhi Mosesa ye ambilepo mba ukeya.

Nobe byonka byo Naambile bufuku bukwapo, Aye wiya mu mazhina asatu; jizhina ja Mwaana wa Lesa, Mwaana muntu, ne Mwaana Davida.

¹⁰⁰ Kimye kyo Ajinga pano pantanda, kimye kitanshi, Aye wajinga Mwaana muntu. Aye kechi wakonsha kwikala Mwaana wakwa Lesa ne; Aye kechi waambile mba byo aji ne. Aye waambile mba Wajinga “Mwaana muntu.” kimye muntu umo wamwipwizhe Aye, Aye waambile mba, “Mwamona Mwaana muntu; ne Mwaana muntu.” Pano, “Mwaana muntu” ke *ngauzhi*. Aye waishile mujoja jishinda, mambo, Kinembelo, Aye kechi wakonsha kwiya mwapusanako na Kinembelo ne.

¹⁰¹ Oene mambo, leelo, kuuba mba yetu—yetu Mbila ya kino kimye kechi yakonsha kwiya kupichila mu bafunda masukuulu a mamboawama ne masukuulu a mamboawama ne, kyafwainwa kubwela ku kintu kimo kyo alaile kuuba. Kyafwainwa kwikala muyewa musango.

¹⁰² Nanchi twatana kuuba mba, mu yiwe Muntu, Aye wafwajilwe kwikala ngauzhi. Kechi Mwaana wakwa Lesa ne, Aye wafwajilwe kwikala Mwaana muntu. Yehoba Ayemwine waichile bangauzhi, Yelemiya ne bakwabo, “Mwaana muntu.” “Inge mwamona Mwaana muntu. . .” “Ing'anyi ao ye Mwaana muntu?” batwajijiletu na kwipuzha.

¹⁰³ Nanchi, Aye waingijile ofweshi Wanji nobe Mwaana muntu. Nanchi Aye waingijile ofweshi Wanji pano nobe Mwaana wakwa

Lesa. Lesa ye Mupashi, kabiji pano Aye byo aingijilenga kupita mu Mankulo a Bipwilo, nobe Mwaana wakwa Lesa. Pano, mu Myaka kiumbi kimo, Aye ukekala Mwaana wakwa Davida, inge Waikala pa jitanda ja Davida. Aye ukekala swanyi pa jitanda, Mwaana wakwa Davida. Mwaana muntu, Mwaana wakwa Lesa, Mwaana Davida, kabiji kimye kyonse ye Muntu umo.

¹⁰⁴ Kijitu pamo nobe Taata, Mwaana, ne Mupashi Wazhila; ofweshi wakwa Lesa. Aye wajinga Lesa Taata, nanchi Aye waikale ke Lesa Mwaana, pano Aye ye Lesa Mupashi Wazhila. Kechi Balesa basatu ne; Lesa umo, kusololwa kwanji pasatu, kwimweshwa kusatu kwa Lesa umo.

Pano twatana mba, kabiji mu kino kimye kyo tubena kwikalamo, Lesa ulama Kyambo Kyanji byonka byo Aye byoaubile kyokya kimye.

¹⁰⁵ Atweba twatana mba Aye waishile kubushiya bwa kalunga kameema. Aye mwanamukazhi wamuketekejile Aye, mwajinga kimo kintu kyajinga mwi aye. Aye kechi wajinga na Kinembelo kya kikye ne, kechi wajinga na Kinembelo ne kana Yoshiwa waimikile juba, bino aye waketekejile mu muchima wani amba Aye wajinga Mwaana wakwa Lesa. Nanchi waambile mba, “Inge Nakonsha kukwatatu ku kyakuvwala Kyanji, Amiwa katambula lubuko.” Nanchi aye wapichile mu jibumba posotu byo wakwachile ku kyakuvwala Kyanji, kabiji ne lukatazho lwa mashi lwaleka.

¹⁰⁶ Pano, Aye watajile pa jibumba, na kumona ng’anyi Wamukwata. Kechi kyaluzhinauko ne, kwajinga muntu umo. Aye waimene. Bonse bantu baishilenga kwi Aye; kabiji bamo balengelenga bisela kwi Aye, bamo bamusekelenga Aye; pulisiti waimene ne ku Mwipuzha, kabiji ne basapwishi, ne bikwabotu. Bino kwajinga bamo Bamuketekejile. Kabiji, kabiji pakupitapo kimye kicheche Waimene, ponkapotu, waalulukile, ne kwamba mba, “Ng’anyi wajikukwata Amiwa?”

¹⁰⁷ Bamo ba mwiabo baambile mba, “Kika, Nkambo!” Naketekela kyajinga Petelo waambile mba, “Kika, jibumba jonse jibena kukushindaika Obewa. Kika, ng’anyi ‘wakukwata’ Obewa? Kika, bantu bonse babena kukukwata Obewa!”

Aye waambile mba, “Bino Naumvwa bulume bwafumamo mwi Amiwa.” Aye waumvwine kukoka. Kyajinga nkwachilo yapusanako bingi.

¹⁰⁸ Inge atweba twakonsha kumonatu kyokya, mulongo, nyenga! Inge obewa wakonsha kumukwata nankwachilo yapusanako! Oo, bantu bakolwa, Amiwa mbena kwimulombelela, mu mamineti achechetu. Amiwa naketekela mba Njina Mupashi Wazhila, kafwako kyakila Mupashi Wazhila kyakila akyo anweba kyomujinakyo, abo banabalume baji nakyo kuno. Aye yenka Mupashi Wazhila umotu, bino ke mikambizho

yakwa Lesa; kabiji umvwe waketekela kyokyo kwikala ke mikambizho yakwa Lesa, ya kulombelela bakolwa, kabiji ne kubika maboko pe abo, kabiji ne kupanga mipashi yatama, kabiji ne milaye ayo Aye yoalaile, kikekalatu pamo ne anweba. Anweba mukatambula kyo mwaipuzha, inge mwakonsha kwikiketekela.

“Mwakonsha kuketekela mba Nakonsha kuuba kikye nyi?” byaambile Yesu.

¹⁰⁹ “Ee, Nkambo, Amiwa naketekela,” byo ambile mwanamulume waji na mwaana wa kashita, “Naketekela mba Anweba yenu Mwaana Lesa wasakile kwiya muntanda.” Pano, atweba twayuka mba mba akya kyakonsha kusendatu abya byubilo byakonsha kuleta mikumbu.

¹¹⁰ Pano, bukiji bukiji, twayai tulangulukepo pe Aye pa kakimye kacheche, papo Aye uji pa jishinda Janji na kwiya. Ng’anga mucheche waishile, kwakubula ne luzhinauko ne awa mulunda mucheche wajinga waitabila wa ku mupaka.

¹¹¹ Kuji bavula bingi bamwi abo mu ntanda leelo, ‘bacheche baitabila ba ku mupaka. Abo bakeba kuketekela Kyokyo. Abo bakeba kuketekela mba Mupashi Wazhila wakine. Abo bakeba kuketekela mba akwe ke ng’endo ya batumwa, byonka Lesa byo alaile mu moba akupelako Aye uketulwila Mupashi Wanji. Atweba...aye ukeba kuketekela mu Malakai 4, amba Aye walaille, mu moba apelako alwa—alwa Lwitabilo lwiine lwa pentekosito lukabwezhiwa jibiji ku—ku kipwilo.

¹¹² Malakai 4 waamba mba. “Talai, Amiwa nkemutumina Elaija mu juba japelako,” abyo ibyo, “kabiji ukabwezha Lwitabilo lwa baana ku bashabo ne jikwabo,” mwamona, “alo Lwitabilo lwa bashabo ku baana, ne alo.” Monai, kyafwainwa kwikala byobyoy.

Mwaamba mba, “Kyawama, awa wajinga Yoano Mubatishi.” Ine, ine.

¹¹³ Yoano Mubatishi wajinga Malakai 3. Abyo ibyo. Mateyo 11 waamba byobyoy, “Inge mwakonsha kwikitambula, awe ye iye waamba mba, ‘Talai, Amiwa nkemutumina muluwe Wami kulutwe Yami.’” Wajinga Elaija, kinetu. Yesu waambile mba byo kyajinga. Bino kechi Elaija wa mu Malakai 4 ne, nangwa pachechetu ne.

¹¹⁴ Mambo, “Kupwishatu yoya Mbila, ntanda ikasokwa na mujilo, kabiji baoloka bakanyantaula pa buto bwa babi.” Nanchi kechi kya mwekelepo mu kimye kyakwa Yoano ne. Atweba tuji na Mbila yakupyanga ne kuleta bantu kwibafumya mumusango wadinominesheni, kubwela ku kine kitanshi, Lwitabilo lwa pentekosito. Kabiji tubena kwikimona kyaubiwa, ke kufikizha Kinembelo akyo kyafwainwa kufikizhiwa. Binembelo byonse byafwainwa kufikizhiwa. Binga abyo byotwafwainwa atweba kwipuzha, kyakonsha kusenda kimye kyami kyabaya kufika pano, mu kumwasha. Bino mwaumvwa bibye bintu, amba

kyafwainwa kumweka monka mo kyaikela, ku baana bakwa Abulahama, nobe byonka Aye byo alaile.

¹¹⁵ Twamona Yesu ubena kuya na kubuka awa songwakazhi mucheche. Mambo, ba taata, baitabila baku mupaka, kintu kimo kyaishile pantu pamo amba aye wamuyukile Yesu, nanchi, awa dokotala wamupele aye. Kabiji aye watolele kisocho kyanji kicheche ne kwikifumyako kana aye wakonsha kutana Yesu. Mwamona, Aye kimye kyonse wikala ponkapa umvwe ubena Kumukeba. Aye wamutainetu Aye kasa abena kwiya ku kitulu.

¹¹⁶ Kabiji aye waambile mba, “Iyai ku songwakazhi wami mucheche, teteka maboko Enu pe aye, kabiji usa kwikalatu bulongo.” Waambile mba, “Aye walala kufika pa kipimo kya lufu. Aye ye yenka wami mwaana.” Waambile mba, “Uji na myaka twelufu. Atweba kechi tujipo na baana bakwabo ne. Mukazhi ne Amiwa,” kampepo, “tubena kukota. Kabiji awe ye yenka mwaana ye tuji nanji, kabiji walala kufika pa kipimo kya lufu. Nkambo, Naketekela Anweba. Inge Mwakonsha kwiya kubikapo maboko Enu pe aye, usa kwikalatu bulongo.”

Monai, kika kyo kyoatulukile? Aye watulukile mba mba akya Kyambo kya Lesa kyalailwe kyasololwa mu yiwe Muntu.

¹¹⁷ Noba byonka byaambile Nikodema, “Labbi, mufunjishi, twayuka mba Anweba mwi mufunjishi wafuma kwi Lesa. Twikiyuka. Ba Faliseo bekiyuka.” Kika kyo babujile kwikisolola? “Kafwako muntu wakonsha kuuba bintu byo Uba ne, kanatu Lesa uji Nanji. Twayuka mba Obewa wafuma kwi Lesa.”

¹¹⁸ Apo twatana kuuba mba Jailosi waketekejile kintu kimo. Aye waambile mba, “Iya teeteka kuboko Kobe.” Aye wayukile mba Lesa wajinga mwi Aye. “Bikai maboko Enu pa mwaana wami. Nangwatu uji pepi na lufu, ukekala na bumi.”

¹¹⁹ Aye wayiletu nanji kulutwe. Kabiji kimye kyo ailenga, kwiya lubilo na kubwela lunyuma, ne kwamba mba, “Kechi mumukatazhe Aye ne, kechi mumukatazhe aye Nkambo kuya kulutwe. Awa—awa nsongwakazhi, wafwa, aye wayaka kala pano. Aye wafwakala.”

Yesu waalulukile ku Jailosi, waambile mba, “Bushe kechi Naamba kwi anweba nenyi, ‘Inge mwakonsha kuketekelatu, mwakonsha kumona lukumo lwa Lesa?’ Inge mwakonsha kwikiketelatu!”

¹²⁰ Aye waile mukibamba, kabiji amwa mwajinga, majilo onsetu ne kujila, ne kwipumpaula, kijitu pamo nobe muntu uji yense byo akonsha kuuba. Nsongwakazhi mucheche wawama, mwaana wamukazhi wakwa kafunga, wafwile, kabiji wafumine mu ino ntanda. Kabiji aye kiine wajinga wafwa maawala avula, kabiji abo bakonsheshe nekumupomba mubivwalo, kabiji wanengezhenga kulenga mubiji wanji kumuba embamu, kampepo, ne kumubika byo byo, kabiji ne mu kuzhikwa.

Nanchi atweba twataine amba Yesu waishile mu nzubo. Abo bonse bapwile ngovu nakwimpupula. Aye waamba mba, “Mutende.” Aye waambile mba, “Kechi wafwa ne, bino aye walalatu mutulo.”

¹²¹ Pano mwakonsha kulanguluka byo balangulukilenga? “Kika, awe muntu twayuka, pano. Twakwantakanya amba Aye kechi mwaana wafikilamo ne. Kabiji atweba tuvwa pe Aye, byonsetu Aye byoambilajimo amba bikamweka amba Aye waamba. Kabiji pano twayuka mba pulisiti ujitu bulongo, ‘awe muntu wakonya,’ mambo twayuka mba aye wafwa. Awa dokotala wabijikile mba aye ‘wafwa,’ kabiji apo ipo aye poalala ne popa. Aye waya kala, kabiji atwaba twayuka mba wafwa.” Abo baambile, abo bamusekele bingi Aye, mubyambo bikwabo, bamulengele Aye kwikala walengululwa, namambo akumwendeleka Aye.

¹²² Bino Aye waambile mba kechi wafwa ne. Abyo byo byonka byo kyubiwa. “Aye walala mutulo.” Nangwatu bekale bakumwendeleka byepi, Aye ukashinikisha Kyambo Kyanji! Aye wibalengele bonse kufuma mu nzubo, ne kufumyamo bonse babula kwitabila. Wasendele popa Petelo, Yakoba, ne Yoano, baitabila, bakamonyi basatu, kabiji ne bashanji ne bainanji, waile monka ne kumutola mwanawamukazhi na kuboko, kabiji waambile mu mulaka ao waichile mweo wanji kufuma kuntu kumo mwine mu Peenape. Kabiji ne nsongwakazhi waikele na bumi.

¹²³ Waubile byepi Aye? Aye washinikishe Kyambo Kyanji. Aye washiniikishe kyo Ambile. Aye kechi wafwa ne. Aye wajinga walala mutulo. Pano twatana mba, kuba kikye, kutuluka, kabiji Aye washinikishe kintu kimo papo. Pano Aye washinikishe mba Wajinga Lesa. Aye washinikishe mba Wajinga na kuyukila jimo. Monai byaamba Kyambo Kyanji. “Aye kechi wafwa ne, bino walala mutulo.” Mwamona, aye kechi wafwile ne, kyakutatwilapotu. Aye wajinga walala. Wamwesheshe kuyukila jimo kwanji. Pano, kwakonsha kwikalapo bavula bacheche bamwingilo bafwa abo bajimumusango umo lukeelo luno, bino awe umo kechi wafwile ne. Aye walajiletu, nobe Lazalaza byo ajinga. Kabiji Aye wamwichile kufuma mutulo, mambo kechi wafwile ne.

¹²⁴ “Kabiji aye waitabila mwi Ami, nangwatu wafwile, byonkabyo ukekala na bumi; kabiji yense uji na bumi ne kwitabila mwi Ami, kechi ukafwa ne.” Bonka baji mu Buuku wa Bumi wa Mwanamukoko, abo Aye boakujile kimye kyo afwile Aye, akya ikyo Aye kyoaketa kufuma mukokwa kulala mutulo, pa joja juba, aba basangululwa ku bulume Bwanji, aba baji na bulume bwakusangululwa bwaikala mwiabo. Nobe byonka byo Naambile bufuku bwapita; nangwatu Elisha byo afwile, kabiji bikupa byanji byalajile mu kilende, abwa bulume bwakusangululwa bwajinga kala mwi aye mubikupa.

¹²⁵ Kine, Aye washinikishe mba Wajinga Ng'anyi. Pano twatana jibiji, nobe byonkabyo, Aye washinikishe ne akyo, amba, mu Bahebelu kyapitala kyabu 4 ne veeleshi wabu 12, Aye washiniikishe mba Aye wajinga Kyambo kya Lesa. Aye kine wikyubile. Monai byo Aubile. Bahebelu, 12, Bahebelu 4:12 waamba mba, "Akyo Kyambo kya Lesa kiji na bulume bwabaya bingi, bukiji bukiji kukila poko yatwa-kubiji, ne—ne Ayo yo Ipima milanguluko ne kulondalonda mwaya muchima." Talai pa kakimyetu kacheche pano.

¹²⁶ Kimye kitanshi kyo atatwile mwingilo Wanji, panyuma Aye ya kwiya na kumwesa mba Aye wajinga Kyambo, kimye akyo Aye afumine mungyetu kufuma mu lweseko Lwanji, kwajinga muntu watelelwe mba Petelo, jizhina janji nanchi wajinga Shimona. Kabiji waishile kwi Yesu na mulongo wanji, Andeleo. Kabiji byo aendele kwiya mu Kyeenyi kya Yesu Kilishitu, Yesu waambile mba, "Jizhina jobe wi Shimona. Kabiji bashobe bajinga ba Yona. Kufuma pa kino kimye obewa ukatelwa mba Petelo." Akyo kyashinikishiwe mba Aye wajinga Kyambo, mambo Kyambo kyo Kipima milanguluko ne kulondalonda mwaya muchima. Aye wajinga Kyambo.

¹²⁷ Filipai wamwene abye nakumwekanyika. Aye waile na kuzhokoloka mutumba, waile aja juba, kabiji ne kubwela jibiji. Kabiji aye waletete mulunda watelelwe mba Natanela. Kabiji waambile mba, "Abye bintu kine bibena kumweka. Mosesa waambile mba 'aye Yehoba Lesa wetu ukemwimenya Ngauzhi' nobe aye, kabiji papo Muntu uji pano. Kika, Aye wabuujile Shimona byo ajinga, ne bashanji bo bang'anyi, kabiji twayuka mba abyo Aye byoamba bya bukine. Mambo, Lesa wikyambile mu Kyambo, kabiji papo kyashiniikishiwa mba Aye wakonsha kuuba kyokya, kabiji akya kimwesa mba awa ye Mesiyasa."

Kabiji byo aendele mu Kyeenyi Kyanji, Yesu waambile kwi aye, amba, "Talai mwina Isalela, mwabula nangwa bubi ne."

Aye waambile mba, "Labbi, kimye ka Anweba kyo mwangyukile ami?"

Waambile mba, "Pilipai kasa akyangye kukwita obewa, kimye kyo wajinga mushi ya kichi, Amiwa nakumwene." Aye washinikishe Kyambo Kyanji. Aye washinikishe Kyambo kya Lesa. Aye wikyubile.

¹²⁸ Mwanamukazhi ku mushima, byo ajinga nabyo... Kyawama, Aye waipwizhe aye amba lekai Aye atomepo meema kufuma mumushima amo obewa mo ubena kutapula meema, kabiji waambile mba, "Kechi kyaswishiwa anweba ba Bayudeya ne kulomba atweba banabakazhi bena Samaliya kintu kyayewa musango ne, mambo atweba kechi tujipo na luvwang'ano ne."

Aye waambile mba, "Pakuuba umvwe Obewa wajikuyuka ye ubena kwisamba nanji, inge wangipuzha Amiwa meema aku kutoma."

Waambile mba, “Awa mushima ke kintu kyazhika.”

Kabiji misambo, byo yatwajijiletu, pakupezhako Aye wataine lukatazho lwanji byo lwaji. Kabiji Aye waambile mba, “Yanga ukalete mulume obe, eye kuno.”

Aye waambile mba, “Amiwa kechi njipo namulume ne.”

Aye waambile mba, “Obewa waamba bukine, mambo waikala na batanu, kabiji ne yiwe ye uji nanji kechi ke mulume obe ne.”

¹²⁹ “Kika,” aye waambile mba, “mwane, Nayuka mba Anweba mwi Ngauzhi.” Aye. . . “Kechi twajinga na umo ne pa myaka foolo aduleedi, mwayukatu.” Aye waambile mba, “Nayuka mba Anweba mwi Ngauzhi. Pano, twayuka mba umvwe Mesiyasa waiya, ao watelwa mba Kilishitu, inge Aye waiya, Aye uketubula bibye bintu. Akya kikekala ke kiyukilo Kyanji.”

Inge Aye waambile mba, “Amiwa yami Iye ubena kwamba kwi obewa,” Aye washinikishe Kyambo Kyanji. Aye. . . twashiniikisha byo Aambile mba byo Aji. Aye wajinga Mesiyasa, awa Mwaana wakwa Lesa.

¹³⁰ Pano twatana kuuba mba, ne apo, awe mwanamukazhi mucheche wajinga na lukatazho lwa mashi, awa wakwachile ku kyakuvwala Kyanji, kabiji kyashinikishe kwi aye amba Aye wajinga Kyambo kya Lesa.

¹³¹ Pano vulukai, bufuku buno, Yesu waambile mba. . . Ne akyo, mu Bahebelu, 1, Bahebelu kyapitala kyabu 3, Naketekela byo kiji, Aye waambile mba, “Aye pano ye Ng’anga Mukatampe,” ino nkulo yo tubena kwikalamo, “awa Pulisiti Mukantampe waikelenga monka Mukipango kya Lesa, amwa monka Mumeeulu, amwa mwafwainwatu kukwatwa mwaila nguvwino yetu yakumupashi.”

Bahebelu 13:8 waambile mba, “Aye ujitu pamo, keesha, leelo, ne myaka yonse.” Ye Lesa umotu uji byooka byo ajinga kunyuma. Aye byobyoyo anji ne bufuku buno.

¹³² Wazhila Yoano 14:12, Aye waambile mba, “Aye wangitabila Amiwa, mingilo Yonguba ne aye ukeyuba. Ne yavula kukila pa iye ukeyuba, mambo Amiwa ngya ku Ba Taata.” Mwamona? “Aye waitabila mwi Amiwa, aye mingilo Yonguba ne aye ukeyuba.”

¹³³ Mu Mateyo 28, Aye waambile mba, “Pa kakimye kacheche ne bapano pantanda kechi bakomona Amiwa jibiji ne, pakuuba anweba mukamona Amiwa, mambo Amiwa kekala ne anweba kufikatu ne kumpelo ya ntanda.”

¹³⁴ Yesu Kilishitu ujitu pamo keesha, leelo, ne myaka yonse. Aye wimana, bufuku buno, mu kushiniikisha Kyambo Kyanji. (Kimye kyami kyaya.) Bino Aye washiniikishe mba wakonsha. Aye washinikishe Kyambo Kyanji nanchi, abya byo Alaile bya joja juba. Aye washinikishe byambo bya Isaya. Aye washinikishe

byambo bya kwa Nowa. Aye washinikishe byambo bya kwa Mosesa. Aye washinikishe bintu byonse bya ambile bangauzhi.

¹³⁵ Aye walaile kyokyo mu jino juba, juba jo tubena kwikalamo, amba ntanda yafwainwa kwikala mumusango wa Sondoma, mwakwisongola mwanamulume ne mukwabo mwanamukazhi ne mukwabo. Anweba ngitalaitu mu ntanda leelo, kuzhokoloka ntanda yonse mo Mbena kwenda; kechi ponka pano ne, konse konse. Ke kyazhobakana. Mu Sweden, banabalume bakitwala ne banabakazhi babena kupitang'ana, baji mulekese-mulekese. Kabiji abo baji mu Germany ne mu France, kabiji ne konse konse, ke musango wabukafuntufutu atweba bena United States botuji nabo. Ke nkulo. Amiwa, inge Naikala na kimye kya kubwela, Nakonsha kutemwa kwamba pa bintu bimo bya bungauzhi, kwi anweba, mu kumwasha anweba mba, nkulo yo tubena kwikalamo. Aye Baibolo waamba mba, "Baana bakatangijila bansemi yabo." [Kafwapo bijipo pa tepu ne-Waku.]

¹³⁶ . . . Kyambo. Bino, vulukai, Abulahama wajinga na lukunwa, ao wajinga lukunwa Izaka. Aye wajinga na kunwa ikwabo panyuma ya lufu lwa kwa Sala. Kabiji aye wajinga na myaka aduleendi foote-faivi, aye wasongwele mwanamukazhi mukwabo, wajinga na baana babalume sebeni kufumyako banababakazhi, mambo Lesa wamwalulwile kubwela ku mwanamulume mwanyike kimye kyo ajinga na myaka aduleendi. Aye wajinga nanchi na foote-faivi, nanchi aye. . . Atweba twayuka mba. Amiwa nemusapwila anweba kuno ku California, myaka yapita panyuma.

¹³⁷ Kabiji pano twayuka mba Lukunwa wakwa Abulahama kechi wajinga lukunwa wa masongola mwi Sala ne, ao wajinga Izaka, ao walengele kyaalo, pakuuba Lukunwa wazhila wajinga ku mulaye, ao wajinga Yesu Kilishitu. Kabiji kupichila mu yewa Lukunwa, Aye wasangwile Lukunwa wazhila. Oo, ami! Pano twi bung'anga ba bufumu, kyaalo kya bufumu, kyaalo kyazhila, ne kupana lutotelo kwi Lesa, kitapisho kya pakanwa ketu kupana lutotelo ku Jizhina Janji. Lesa washiniikishe Kyambo Kyanji, Aye waitulwijile Mupashi Wazhila pe atweba.

¹³⁸ Aye waambile mba, "Byonka byo kyajinga mu moba a Sodoma, nanchi byobyo kikekala mukimye kya kusololwa Mwaana muntu." Pano bushe mwayuka nyi? Kufuma ku Mwaana wakwa Lesa, saka Akyangye kwikala Mwaana Davida, Aye wisolola Ayemwine ne jikwabo nobe Mwaana muntu. Bushe mwamona Kinembelo nyi?

¹³⁹ Mambo, Aye kimye kyonse uba, Aye kechi ubapo kintu nangwa kimo ne kanatu Aye wikimwasha ku bakalume Banji bangauzhi. Abyo kine ibyo. Abyo byo byajinga mulaye Wanji. Mwamona? Aye kechi ubapo kintu nangwa kimo. . . Lesa kechi

wakonsha kubepa bubela ne. Aye kimye kyonse wikisolola, patanshi, Aye kasa akyangye kwi kyuba.

¹⁴⁰ Talai pa musango umo ye twaikalamo leelo. Talai potuji atweba. Anweba bonse mwakonsha kuswa mba tuji mu Sodoma wakatataka. Anweba mwayuka mba kino kyaalo kiji monka. Kuji. . . kyakila pa luketekelo; kechi kujipo lupulukilo lwashalapo mu kino kyaalo nangwa kyaalo kikwabo ne. Atweba twapitaila pa kyokya kimye. Bya bungauzhi bya awilwe pa kikye, byafikizhiwe. Lesa kasa abena kufunga, mukuleta mukoko mucheche wapelako akwa konse koaji. Byonse byafwainwa kutwela mukachi juba jimo. Tuji mukimye kya kumpelo. Talai, kwikajikwa mukifulo.

¹⁴¹ Amiwa ne mwipuzha, nobe mulongo nangwa nyenga, kuuba mba tushimike lwitabilo lwabaya bingi kasa tukyangye kulombelela baabo bantu. Kabiji Nayuka mba kechi twafwainwa kuya pa kimye kimo ne. Bino Amiwa—Amiwa—Amiwa nasaka kutatula mulaini wa milombelo, nanchi anweba mwafwainwa kuya muye nanchi. Mwamona? Anweba mubena kukeba kwikala mu mulaini wamilombelo lekai twikale. Bino lekaitu amiwa, nobe mulongo, kwikyambatu kintu kimo pakakimye kachechetu kwi anweba.

¹⁴² Monai Yesu, mu Luka 17:30, monai, kimye kyo Aye a ambilenga kookwa na mambo a kimye kya kumpelo, byo bakekala nobe mu moba akwa Nowa. Nanchi Aye waambile mba, “Kabiji nobe, byonkabyo, mu moba a Sodoma,” waambile mba, “kimye Mwaana muntu po akasololwa.” Aye Mwaana muntu jibiji, kechi Mwaana Lesa ne. “Mwaana muntu,” monai, akyo kileta mu Malakai 4 jibiji, kubwela jibiji. Abye byonse bya bungauzhi bibena kwiya monka, byo kyafwainwa kubiwa. Aye ushinikisha Kyambo Kyanji pakuuba mba kikale byonkabyo. Abyo ibyo.

¹⁴³ Kabiji monai, pa kuuba kyokyo, Aye byo aka mwitulwila Mupashi Wanji pa bantu bonse, kabiji kika kisakumwekanyika, musango wa kubwezhiwa bintu byonkabyobyajinga mo akeshila jibiji. “Kabiji baana benu babalume ne babakazhi bakaulanga. Nketulwila Mupashi Wami pa bakalume ne pa bazha Bami. Kabiji Amiwa nkamweshwa biyukilo mwiulu.”

¹⁴⁴ Njina kipikichala kuno, kya Mulongo Lee Vayle kuno. Nasaka kwi mumweshwa kyamwekele pa mutumba, juba jikwabo, kimye baana ba sukuulu po baalulukile, kasa tukyangye kwikala na yiwe mutwe mukatampe wa kushinkula, atwa Tutetesho Tutanu na tubiji. Kimye baana basukuulu babacheche byobakombokele, najinga peulu popa mumilombelo, akwa kwajinga Mujilo ao waishile panshi, nanchi nabwele kunyuma ne kusabika, kabiji nekubwela jibiji nakuzhokoloka ne kubwela jibiji. Abyo byoambile Aye byakuya nakubula bantu. Atweba . . .

Akwa Byokwajinga, akwa kumasukula aku Tucson...kabiji akwa Kokyaile monka mumwela.

¹⁴⁵ Kabiji saayasi wasendele bipikichala, ne bikwabotu, ne kwipuzhapo pa Kyokyo. Baambile mba, “Kiji kwepi? Kika kyamwekele?” Abo kechi bakonsha kwikyuba ne, mwamona. Oo, kechi kyubiwa mu koono ne, kanatu milanguluko ya fishi. Kechi... Yesu, kimye kyo Ajinga pano, kwajinga mamilyoni a bantu kechi bayukile mba Waji panopantanda ne. Ee. Kukekala mamilyoni leelo kechi bakakwatakanya ne, makumi a mamilyoni abo.

¹⁴⁶ Bino kukekala akwa, ku Boba Akyo kokikatumwa, abo bakakwantakanya. “Bamaana bakayuka Lesa wabo mu joja juba, kabiji bakoba bikatampe.” Twavuluka mba, kimye kyo tubena kwikalamo.

¹⁴⁷ Talai pa Sodoma pano, talai kyamwekele. Aye waambile mba, “Byonka byo kyajinga mu moba a Sodoma.” Kwajinga jibumba ja bantu bapembejilenga mwaana walailwe. Twaketekela kyokyo. Awa wajinga Abulahama ne jibumba janji. Kwajinga jibumba ja kyambazhi, Lota, wabwela panyuma kichika, nangwa byonkabyo waitabila; monka mu Sodoma. Misango ya bantu isatu.

¹⁴⁸ Kimye kyonse kwikala misango yabo isatu. Hama, Shema, bantu bakwa Yafeti. Kabiji, baitabila, bakitabila-mbijinga, kabiji ne babula kwitabila. Baji konse konse, kabiji atweba— atweba twibatana mu jibumba jonse. Kabiji, konse konsetu, anweba mukebatana. Kabiji aja jibumba kojikiji kuno. Anweba mwafwainwa kwabanya kyokyo. Mwakonsha kwikisenda kupichila monka mu Kinembelo, kikebaitu monka akyokine.

¹⁴⁹ Telekai ku kikyee. Talai ko twaikala, mukifulo kyetu ne mubungauzhi, bufuku buno. Pano, atweba bonse twayuka mba ntanda iji mumusango wa Sodoma.

Twayuka byonse bya bungauzhi bya mu Isalela, uji mu ntanda yanji. Inge anweba mukeba kuyuka kyalo apo potuji atweba, talai Isalela, pepi poaji.

¹⁵⁰ Inge mubena kukeba kuyuka musango wa kipwilo byo kiji, monai banabakazhi byo booba. Aye ye kipwilo. Monai aye, byubilo byatama, mwajilo yatama; talai, monai pepi paji kipwilo. Talaitu, monai, monai, talaitu banabakazhi. Mwamona pepi, abyoo banabakazhi benu byobabena kwilengulwisha ne kwikala bavulang’ana, ajo jo jishinda biji kipwilo kyenu, mwamona, awe musango.

¹⁵¹ Talai kuji Isalela, mwamona pa kimye kyo tujimo. Monai, talai pa bibye biyukilo ne bya kukumya. Inge anweba—inge anweba, nangwa inge meso enu ashikuka, monai pepi po tuji.

¹⁵² Pano monai kifulo kyetu kyo twaikalamo, ntanda mu musango wa Sodoma. Pano monai, “byonka byo kyajinga.” Pano

monai, pajinga muntu umo, pa joja juba, na kupembelela mwaana walailwe ubena kwiya. Abulahama ne Sala, bapembejilenga mwaana walailwe mu jibumba ja kwa Abulahama. Abo kechi bajinga mu Sodoma ne. Bino pa kimyetu kicheche, kyapitala kyapelako kya kubiwa, kasa akyangye kwiya mwaana walailwe, kwajinga bantu basatu bafumine Mwiulu, Malaika . . . Bamalaika babiji ne Lesa. Kabiji baishile ne kwamba ne Abulahama, mushi ya kinchi kya maoka. Abo ibyo nyi? Kabiji babiji baile ku Sodoma ne kubijika na bubu bwa muzhi. Kabiji kyajinga kimye kasa bakyangye kusoka akya kyallo kya Bangetila, pa kyokya kimye. Bonse bena Sondoma baonaikile. Nanchi kwajinga bacheche balupukilemo, Lota ne baana banji bababakazhi. Aye mukazhi wanji kechi wakonsheshe ne; aye wabwelele munyuma. Byo Nakonsha kwikala na kimye kya kwimumweshwa ponka pano, apo kipwilo po kyafika pa kyokya kifulo. Nasaka mba mumone pano.

¹⁵³ Kabiji Muntu umo waiketele kunyuma, ao waambilenga kwi Abulahama, kabiji Waubile kiyukilo kwi Abulahama. Kabiji, monai, Abulahama wamwene Lesa mu biyukilo byavula. Twaketekela kyokyo, kechi ibyo nyeni? Kasa akyangye kwiya mwaana. Bino mwaana kasa akyangye kumweka ne, kwajinga kiyukilo kyo apellewe.

¹⁵⁴ Mambo, Mwaana, Mwaana wakine, wajinga Mwaana wakwa Lesa, kupichila mu lwitabilo lwa kwa Abulahama, monai, wajinga Yesu. Atweba byo tuji lukunwa wakwa Abulahama, twafwa mwi Kilishitu, twi lukunwa wakwa Abulahama.

¹⁵⁵ Monai pano akya kasa kikyangye kubiwa ne, awe mwaana wafwainwa kwiya. Bino, awe Umo waiketele ne kwisamba ne Abulahama, wajinga na nyuma Yanji yavundamina ku tente, kabiji Aye waambile mba, "Abulahama." Pano, kasa juba jikyangye, aye wajinga Abulama. Pano Aye waambile mba, "Abulahama, mukazhi obe uji kwepi, Sala?" kechi Selai ne, Sa-l-a. Sa-l-a, mwana mfumu. "Mukazhi obe uji kwepi, Sala?"

Waambile mba, "Uji mutente kunyuma Yenu."

¹⁵⁶ Aye waambile mba, "Amiwa nkakupempula, mwamona, mwayila mulaye Wami ye Nakulaile." Mu byambo bikwabo, "Kimye kya bumi, Sala ukatatula mu kimye kyanji kya bumi jibiji."

¹⁵⁷ Kabiji Sala, byo aji mukote, myaka aduleendi, mu tente, wasekelela kuboko kwanji. Mwamona, aye wamwemwesele ayemwine, waambile mba, "Nga awa Muntu wakonsha kwikala bulongo byepi? Mwamona, amiwa ne mwaana mukazhi mukote, nkambo yami Abulahama kokwa, ne aye mukote, kwiya pamo kwa kisemi kwapwile myaka yapita." Waambile mba, "Nakonsha kwikala byepi na lusekelo jibiji na nkambo yami? Aye byoaji mukote, kabiji ne amiwa mukote, kusema

kwapita, mishipeshipe yamabele yaya, byonse. . . 'Aye wauma.' Twakonsha kwikala byepi na lusekelo jibiji?"

¹⁵⁸ Kabiji awa Muntu, na nyuma Yanji yavundamina ku tente, waambile mba, "Kika Sala kyo asekela, kwamba mba, 'Abye bintu byakonsha kwikala byepi?'" Kyajinga kika? Kuyuka bapashi, bungauzhi! Mwamona? Mwamona? Abyo byo amwene.

¹⁵⁹ Pano Aye waambile mba, "Akyo kikabwela jibiji, kabiji ne Mwaana muntu," ao wajinga, awa wajinga Mwaana muntu ponkapa. Kyawama, wamutelele Aye mba Elohimu, "Nkambo Lesa." Elohimu, uji yense wayuka mba abyoyi, Elohimu ke Nkambo Lesa. "Muntendekelo Elohimu walengele meulu ne ntanda," aye Umo wafikilamo-mubyonse. Awa Mwaana muntu walengelwe ke muntu, Waimene popa mu mubiji pa kyokya kimye, nobe fiyofani, waimene popa kasa abena kuyuka bibena kwamba Sala mu tente kunyuma Yanji. Aye walaile. Talai. Awa Lukunwa Wazhila wakwa Abulahama walailwe kumona kyokya kintu kimo.

¹⁶⁰ Bino monai Lota, wajinga na muluwe konka kwa, ne aye, babiji baile kookwa. Umo mwiabo waile konka, kabiji mukwabo wayile nanji, kabiji basapwijile ne kwita bantu kunyema kufuma ku bukaji bubena kwiya.

¹⁶¹ Kifulo kiine, ntanda kechi kyakikalapo mukyokya kintu ne, kufuma mu joja juba amba Yesu walengele mulaye, poso ponka pano. Amiwa nasaka kwipuzha awa wamashimikila apita awa wakonsha kwikala mukishimikwa, nangwa inge mwauvwwa kuono tepu, ne kuvwa kimye kiji kyonse, nasashijila ndembaipo. Amiwa natanga jishimikila pano pa myaka sate, jishimikila ja Baibolo, kabiji kechi kwakikalapo muntu ao ye Namonapo kala kunyuma mu jishimikila ja kipwilo, kupita mu mankulo abipwilo bitanu na bibiji. Amba pano tuji mu Laodikeya, kabiji twayuka kyokyo.

¹⁶² Kechi kwakikalapo muluwe ne, ao waile ku kipwilo kyonse, uji najizhina japela na h-a-m, poso pano. G-r-a-h-a-m, Billy Graham. Kwajinga Moody, Finney, Sankey, Knox, Luther, kabiji ne bakwabotu, bino kechi h-a-m, "taata ku byaalo." Pano vulukai, aye ke G-r-a-h-a-m, ke bisopelo sikisi, bino A-b-r-a-h-a-m ke bisopelo sebeni. Monai, abo baji kokwa, Billy Graham, kasa babena kuya mu—mu mampuzha onse a pantanda, kabiji ne kwita kufuma mu Sodoma, "Lupukaimo, nyemai bukaji bubena kwiya." Kechi kujipo muntu umo ye Nayuka ne, mu bujimi, awo wakwata Lesa, pa kyokya kyambo kya lubingisho, nobe byonka byaubile Billy Graham. Aye wakonsha kwikyuba. Aye kechi wafunda byambo bya lesa ne, Naketekela aye ke wafunda masukuulu abyambo bya lesa, bino aye kechi ke mufunjishi wa bulume ne, bino Lesa uji nanji, awa muntu ukemana na lufunjisho lwa sukuulu wa pa Mulungu, wakwachijilatu aba

bantu, aye ye kalume wakwa Lesa wa kimye. Kwi ng'anyi? Kipwilo kya ku mubiji, akyo kiji mu Sodoma.

¹⁶³ Bino vulukai, kwajingapo kipwilo kimo kya bumupashi, akyo kechi kyajinga mu kipwilo kya dinominesheni ne, nangwa byonkabyo. Jaitwa-kulupukamo jibumba, kabiji batambwile mbila, neapo, kabiji ne muluwe. Kabiji kyajinga kika? Kuyuka milanguluko yajinga mu muchima. Lesa kimye kyonse ushinikisha Kyambo Kyanji.

¹⁶⁴ Twayai tulombe. Mutemwe Taata Wamwiulu, akye kimye kya katazha, apo kufukula po kwafwainwa kulengwa, kimye kibena kupwa na mambo a kimye, kechi twayuka ne kana ng'anyi kimye Nkambo yetu po akeya. Kabiji byo tubena kumona bibye bya bungauzhi byalengelwe kwi Aye, kupichila mu bangauzhi Benu kupita mu mankulo, pakino kimye babena kusololwa. Anweba Lesa, byo Ne musachila Anweba pa kikye, pakuuba mba muntu ekale na-muntu, wakonsha mu—mu sukuulu wa mamboawama, akyo kyafwainwa kwimenga bujimuko bya ntanda ne kubula kuketekela, kabiji pa ano mapaneo, kabiji ne kupitaila kivule kyaluzhinauko kyaimana kyakosa ne kuchichinka, byo twayuka po baimana ne kushinikisha akyo Kyambo kwikala kyakine, kupichila mu Binembelo. Kabiji nanchi atweba tubena kupembelela Kwiya Kweni, Nkambo, kwitabile abye bintu bikwabo amba byaawilwe ne kufikizhiwa pano pantu, mukwimana na lusekelo lumweka Anweba nakwenda monka mukachi ketu kabiji ne kuba kintu akyo kyonka Anweba mwaambile mba kikeya kufikizhiwa, kushinikisha Kyambo Kyanji kwikala bulongo. Lesa wa Peenape, baana Benu bakolwa baikala muno.

¹⁶⁵ Amiwa kechi nayuka kimye byo twafwainwa kwingila ne. Ke juba ja mabaanga abufuku jibena kutwela. Bino Anweba mwalaile mba, ku ngauzhi, “Kukekala Kyeya mukimye kya mabaanga abufuku.” Kabiji twamona juba jimo jisamina ku musela, jo jonka jizhikila ku muzhika. Lupimpu lwabwikalo bwa bantu bwaendele pamo na juba kabiji pano tuji ku Kitulu kya Kumuzhika, kabiji Mamboawama aenda na lupimpu lwa bwikalo bwa bantu. Pano, Taata, twayuka mba akwe ke mpelo ya Mamboawama, mpelo ya kimye, mpelo ya nkulo. Aye ubena kuya mu Peenape. Bino Anweba mwalaile mba Mwaana ukeya, Mwaana muntu ukasololwa. Mu moba apelako, akye kikobiwa. Akyo Kyeya kya mabaanga a bufuku kyaiya, Taata. Twimusachila Anweba pa kyokyo. Kabiji na kwikepesha nobe byo kiji, nangwa byonkabyo Anweba mwikyuba mokyapelela, bimye byavula, akyo kasa kibena kuya mujishinda japeulu jikatampe, ja-telwamba kyazhika kyamilanguluko, ne kusolola twaana nobe babena kufunda.

¹⁶⁶ Nalomba, Lesa, amba Anweba musakwikyuba byobyoy, bufuku buno, amba baana Benu bakamulanda bakolwa muno basakumona mulaye wakwa Lesa, kabiji kila umo umo

waketekelwa kubukwa, kabiji ne kulupukamo kufuma kuno, kesha jikeya, na mibiji ipya yakosa, kabiji ne kwikala bulongo jikwabo. Kiswishai kye, Nkambo, pakuuba mba basende Mbila kufuma ku umo ne kuya ku mukwabo, poso awa wapelako uji mu jitanga, bino apa ne bizhilo po bikashikiwa. Tukwashai, Lesa mutemwe. Amiwa ne mwipuzha Anweba, bufuku buno, ku menso a byonse bye, inge Anweba mwakonsha jimotu, Taata, kwi amiwa.

¹⁶⁷ Kya—kyamwekele nobe, bufuku bukwabo, bantu kechi bekinwene pabaya ne. Bino, Nalomba, lekai kimweke ne jikwabo bufuku buno, Nkambo. Mambo, Amiwa napita pa kimye kyami kyatongwelwa kwamba, bino kechi Nayuka bimye binga byo tukeyuba ne. Nanchi, Nalomba, Taata, Anweba musakung'umvwa nyi? Kabiji umvwai milombelo ya baabo banabalume ba bulesa ne banabakazhi baikala muno bufuku buno, abo bayulwa na Mupashi Wenu. Abo ke baitabila, Nkambo, Anweba mwakonsha kwingila mukachi kabo. Kabiji atweba tuji... Nalomba mba Anweba musakushinikisha Kyaambo Kyenu kyo Mwaambile, "Aye wangitabila Amiwa, mingilo Yonguba ne aye ukeyuba." Lekai kikale jibiji, Yesu, pa kushinikisha mba Anweba mwi umotu keesha, leelo, ne myaka yonse. Amiwa ne kipuzha ku lukumo lwa Lesa, mu Jizhina ja Mwaana Wanji, Yesu Kilishitu. Amena.

¹⁶⁸ Pano, pa kakimyetu kacheche, Nasaka kuyuka bantu baanga muno baji na bitupa bya milombelo. Na—Nasaka namba anweba musuntule maboko enu, umo umo uji na bitupa bya milombelo. Kyawama, ke kyabonse, Amiwa nalanguluka, ke kyabyonsetu.

¹⁶⁹ Nakumya kana baanga bantu muno babula kwikala na bitupa bya milombelo, bino kasa bakolwa, mwakonsha kusuntulako maboko enu ne kwamba mba, "Amiwa kechi jipo na kutupa kya milombelo ne, bino nangwa byonkabyo Amiwa nakolwa. Amiwa nakabila."

¹⁷⁰ Nasaka kwi mwipuzha kwikala na munema pa kakimye kacheche. Pano, Natemwa kwamba kwi anweba. Alo lo lukatazho lwami kimye kyonse, Ng'amba kimye kyabaya. Bino kasa ukyangye kwiya, Na—Naketekela ne kuketekela mba Lesa usa kushinikisha kikye kabiji ne kyokya kyo Naamba kwikala kya Bukine, kabiji lekai—lekai Aye amonetu.

Pano, baanga baikala muno bakolwa, ao wayuka mba Amiwa kechi nayukapo kintu nangwa kimo pe obewa ne, sutulai maboko enu. Talaitu pa kyokya. Kijitu bulongo.

Nakeba anweba kwakubula bitupa bya milombelo. Bitupa bya milombelo bikaletwa. Nasaka namba anweba mulombe.

¹⁷¹ Aye Baibolo waamba mba, "Yesu Kilishitu ujitu pamo keesha, leelo, ne myaka yonse." Aye waamba mba, "Aye ye Ng'anga Mukatampe waikala popa kasa abena kusashijila pa kwisolola kwetu." Twafwainwa kwisolola patanshi, Aye

kasa akyangye kwikala Ng'anga Mukatampe, mambo Aye usashijilatu monka mwaila kwisola. Nanchi akyo kechi kiji bulongo, mutemwe wamwingilo? Monai, Aye unengezhatu monka mu kwisolola kwetu, byo twisolola amba Aye byo aji, ne byo Etubila. Kechi kyokya Aye *kyo* akooba ne. Aye wikyuba kala. Twafwainwa kwisolola mba Aye wikyuba. "Aye wamanyikilwe namambo amizhilulwila yetu, ku bipumo Byanji ko twabukijilwe."

¹⁷² Pano, Taata Wamwiulu wayuka. Kabiji pa kutala pe obewa, ke kumona mba Nayuka mulunda nami wawama kufuma ku Ohio, aye ne mukazhanji baikala muno, ke Mr. Dauch ne mukazhi wanji. Kabiji Naketekela, byo aikele wabubiji nangwa babusatu kufuma pe abo, aye ukijitu Levalandi, Mr. Blair ao ye Namwene bufuku bwapita. Mwafiita mu jibumba, kwi amiwa, mwaila kikye kyeya kuno ke musango wantemeno icheche kwi amiwa, kabiji Amiwa—Amiwa kechi ne mumona bulongo ne.

¹⁷³ Bino Nasaka namba obewa ulombe. Kabiji ubikepo pa muchima obe kintu kyo ubena kukabila, kabiji mubena kwipuzha Ng'anga Mukatampe, Ao wakonsha kukwatwa ku bya lumanamo byetu.

¹⁷⁴ Pano, amiwa kechi nakuyuka ne, kabiji wakonsha kukwatakotu pa byonse, wikale nobe kukwata mulongo obe, balume bobo, kafunga wenu, muntu umo, kechi kyakonsha—kechi kyakonsha kuubapo kintu kyawama ne. Bino inge mwakukwata Aye, kabiji inge atweba kiine tuji monka mumulaini wa Mupashi Wanji, nanchi Aye wakonsha kwingijisha lwitabilo lobe lwa kumukwata Aye, kabiji kya bupe kyami kya kwamba kunyuma.

¹⁷⁵ Mwaamona, Amiwa nakonsha kuzhindamatu nobe bibye, akye ke *kuno*, kwakubula jiji jakwikyamba. Akwa kwafwainwa kuya ku...Akye, akye ke kuzhindama kwakubula kwamba kintu pano mwi akyone. Kabiji nanchi ne muntu uji yense, kechi waamba ne, inge kyaiya ku bibye bintu, kanatu Lesa waamba kupichila mwi abo.

¹⁷⁶ Pano lombai, kabiji mumone kana abye bintu byo Naamba bya bukine. Lesa etukwashe kwikala byonkabyo. Amiwa kechi naamba mba Aye ukeyyuba ne. Naketekela mba Aye ukeyyuba. Amiwa naketekela mba Aye ukeyyuba. Aye kechi wakinshapo amiwa bunke ne, myaka yonse yapitapo, bushiya nangwa kuzhokoloka ntanda, na misango yonse ya byaalo, kabiji ma milyoni a bantu. Aye kechi wakinkankalwapo ne. Kabiji Njina luketekelo, byonka byo Naketekela mba Naimana pano, Aye kechi ukankakalwa ne.

¹⁷⁷ Amiwa mbena kwi mwipuzha kwikala na munema ne kwikala panshi, pa mamineti achechetu. Atweba tusa kupalang'anya jibumba jikantampe ne kulombelela bakolwa, mukakimye kachechetu.

178 Bino Amiwa nakeba mba anweba, anweba mwaitabila, amba kechi mutale kwi amiwa ne, bino ketekelaitu. Nekwaamba mba, “Amiwa naketekela abya byaamba awe muntu amba Kinembelo. Amiwa kechi nayuka ne nobe pakino kimye apo aye po ajikwaambila kwi atweba. Bino, inge byokiji, nanchi kyafwainwa kumweka. Inge Byambo byanji ke Byambo bya Lesa, nanchi, byambo byanji bikankakalwa pakuuba Byambo bya Lesa kechi byakonsha kukankalwa ne.”

179 Lesa wakaswa kufikizha Kyambo Kyanji. Aye Ukekishinikisha. Aye Ukekishinikisha. “Aye wangitabila Amiwa.” Aye washiniikishe mba jino jo juba japelako. Aye washinikishe bintu bikamweka. Aye washinikishe mba abye byafwainwa kumweka.

180 Kabiji, vulukai, Abulahama ne jibumba janji kechi batambwilepo kiyukilo kimo kufuma kwi Lesa ne, poso mwaana walailwe wafika. Baanga bayuka mba akyo kyakine? Akya kiyukilo kya kuyuka bapashi! Kabiji Lukunwa wa kwa Abulahama wabufumu, lekai ne mumvwe... Lekai ne mubuule, ABYO BYOBYAAMBA AYE NKAMBO, anweba mubena kutambula kiyukilo kyenu kyapelako. Akyo kijitu mwaila Binembelo kabiji ne lumwekesho lwa kwa Lesa luji mu muchima wami, akyo kyaamba mba abwe bo Bukine. Kabiji Naketekela mba anweba musa kwikiketekela kwikala kya Bukine.

181 Pano mwaketekela. Muntu yense ketekelaitu, ambai mba, “Nkambo Yesu, lekai ne mukwate Anweba. Amiwa njina kyakukabila mu muchima wami, kabiji Nayuka Mulongo Branham kechi wayukapo kintu nangwa kimo pe amiwa ne. Amiwa kechi namuyuka awe mwanamulume ne, aye kechi wanyuka ne, bino Mwayukatu. Kabiji inge aye wambula Bukine, aye kikamweka.” Nalomba anweba, kechi mweende ne pano, pa kakimye kachechetu. Ikalai byonkabyo . . .

Monai, anweba mwi mupashi. Kabiji Amiwa natola mupashi yense uji muno mu luusa lwami, mu Jizhina ja Yesu Kilishitu, amba Kyambo Kyanji kifikizhiwe.

Pano ikalaitu na munema. Lombai. Talai kwi Aye, ambai mba, “Nkambo, Nekiketekela. Kwashai Anweba kubula luketekelo lwami.”

Twayai tutatule. Nafwainwa kutemwa kwikala kulubaji lwa kishimikwa kimo papo, mambo, monai, bavula ba mwianweba, kabiji umo umo mwi anweba ke mupashi.

182 Amiwa kechi nakonsha ne. Anweba mwaamba mba, “Bushe nga ami?” Amiwa kechi nakonsha kwimubula anweba ne. Ke kiimenatu. Yonse mingilo yakwa Lesa eimena. Akwa kusa kwikala bantu bavula bakutambula lubuko bakupita kuno ku pulatifomu, bufuku bunu, akwa kukekala kiine kechi bavula ne. Yonse ke kwiimena kwabu Lesa. Ng’anyi wakonsha ku mubuula

Aye bya kuuba? Kafwako nangwa umo ne. Aye wingila monka mwaila kyaswa muchima Wanji Mwine, mutanchi Wanji Mwine.

¹⁸³ Bino waketekelatu. Kwikala wikepesha. Kechi kwikala na lubazhibazhi ne. Wafwainwatu kwiya kwi Lesa, ne kwamba mba, “Nkambo Lesa, Nekiketekela.” Mwamona? “Lekai nkware ku kyakuvwala Kyenu. Amiwa nakabila *kikananga-ne-kikananga*. Nayuka mulongo kechi wanyuka ne nangwa kuyuka kukabila kwami ne, bino aye witubuujile pa bibye bintu byo Mwaubile, ne kwamba mba Anweba muji muno mu musangotu umo.”

¹⁸⁴ Akyo kechi kimufumyako balongo kuno ku pulatifomu ne, anweba bonse. Amiwa ne mwipuzhatu, balongo bami, nobe bantu bamingilo ba—ba Mamboawama akwa Kilishitu. Naamba kwi anweba na bukishika nobe byonka byo Nayuka, nobe—nobe muntu ubena kufwa ne anweba, monai, kusha ino ntanda. Twafwainwa kufumapo. Kabiji Nafwainwa kupana mukumbu pa Juba ja Buchibishi bwamambo, pa kyo Ng’amba. Amiwa natako bingi muchima kubyobyoyo, kuteshako bingi muchima. Kabiji Amiwa nemusachila bingi anweba bantu, byomuji, kasa mwaimana ne ami, munkunkwasha ami. Amiwa mbena kweseka kwimukwasha, kuuba kiji kyonse kyo Nakonsha kuuba, namambo akukeba Bufumu-bwa-Lesa.

Mbena kulomba ne kwipuzha.

Kuno, banga bakimonapo Kyeya kiji pakipikichala? Anweba mwamona kipikichala Kyakyo? Kyakobama *ponkapa*. Kechi mwakonsha Kwikimona ne?

¹⁸⁵ Kiji ku yewa inetu waikala popa na katambala kanji. Aye ubena kulombelelako mutemwe wanji. Abyo ibyo, inetu. Awa mutemwe obe...Mwaketekela mba amiwa ne ngauzhi Wanji, nangwa mba ndekelaiko mambo, kalume Wanji nyi? [Nyenga waamba mba, “Amiwa kine byonji.”—Waku.] Mwaketekela kyokyo nyi? Kijitu bulongo. Pano, inge Lesa wakonsha kumbula kyatama, kika, wakonsha kwikiswa amba kyafuma kwi Lesa, nobe byonka mwanamukazhi wakwachile ku kyakuvwala Kyanji? Pano, mwayukatu obewa wi—obewa wi tweti nangwa sate fiti kufuma kwi amiwa, nangwa kukilapo, kechi wajikukwatapo amiwa ne. Bino wakwachile pa Kintu kimo, kyo wayuka mba wakwatakanatu na Kintu kimo, Muntu umo. Kyo kika, ke kya mwanamukazhi, ao mwanobe wamukazhi. Abyo ibyo. Bushe waketekela mba usa kwikalatu bulongo nyi? Aye ke muzha kubizhima. Abyo kine ibyo. Namona aye koowa, wapendwa. Mwamona? Bino, katambala kamilobelo ko ujinako mumaboko obe, wikabike pe aye, kabiji kechi uzinauke ne. Naketekela mba Lesa usa kumupokolola. Mwakonsha kwikiketekela pamo ne amiwa nyi? Amena.

Bino, kechi Namuyuka awe mwanamukazhi ne, bino Lesa wamuyuka. Bushe mwaketekela pano na muchima wenu yense

nyi?

¹⁸⁶ Awa muntu waikala popa najilaya jamyalamyala, na kikola kyabimbwatumbwa, mwaketekela mba Lesa usa kwimubuka ne kwimulengela kwikala bulongo nyi? Mwaketekela mba Aye ukeyyuba? Amiwa kechi nakimonapo awe muntu mu bumi bwami ne. Munji na kitupa kya milombelo, mwane nyi? [Aye mulongo waamba mba, “Ine, kechi Byonji ne.”—Waku.] Kechi muji nakyo ne? Kechi ukebapo kimo ne.

“Inge mwakonsha kuketekela!”

¹⁸⁷ Apo paikala mwanamukazhi ubena kukeba kutala peulu ya yiwe mwanamukazhi waikala papo. Aye ke mwenyi kwi amiwa. Pano aye uji bingi na lubazhibazhi. Amiwa kechi na muyuka ne. Amiwa kechi na kimumonapo, mu bumi bwami ne. Bino Lesa wamuyuka, kabiji ne aye watuluka ponkapano aye uji mukusokankana na Kintu kimo. Obewa walombelanga kintu kimo. Eene mambo o waikela, kechi wakonsha kwikala kukila pa bifuku bunu ne. Obewa wafwainwa kusha mbung’eno. Obewa ubena kunengezha kuya ku nzubo yobe, keesha. Obewa kechi wafuma kuno ne, nangwa obewa kechi wafuma ku California ne. Obewa ubena kuya ku musela kufuma kuno. Obewa ubena kuya mwiulu. Ubena kunengezha kufumapo kuya mwiulu. Obewa wafuma ku Oklahoma. Ee. Abyo ibyo.

¹⁸⁸ Obewa uji mu musango waktwalwa kulufu. Obewa waiya kuno na kulombelelwa. Obewa kechi uji na kitupa kya milombelo ne. Bino waketekela mba usakutambula lubuko, inge wakonshatu kufika pano. Abyo ibyo. Ne apo, musango obe ke kaasa. Awa kaasa uji mu kikupa. Bushe waketekela mba usakutambula lubuko ponka pano nyi? Waketekela mba obewa wakwatankana Nanji, nyenga yami? Kampepo Lesa usakumbula kana yobe ng’anyi, nanchi bushe akyo kyakonsha kwimukwasha nyi? Inge byokiji, suntulai kuboko kwenu inge mwaketekela kyokyo, amba (Lesa) wafwainwa kwimukwasha. Kijitu bulongo, Mrs. Steel, wakonsha kubwela ku Oklahoma.

Amiwa kechi na muyuka inetu ne. Amiwa kechi na kimumonapo kala ne.

¹⁸⁹ Apo paji inetu waikala kunyuma kukwe. Aye ubena kumanama na mishipeshipe yavimba. Kabiji uji ne na mwaana ao ke kitomi, kabiji ubena kumulombelela. Inge wakonsha kuketekela, wakonsha kutambula lubuko. Mrs. Mason, wakonsha kuketekela na muchima obe yense, kabiji ketekelai mba Yesu Kilishitu usa kuswisha lubuko kwi anweba nyi? Mwaketekela nyi?

Kijitu bulongo, nanchi bika kuboko kobe pa yewa inetu waikala kwipi ne obewa popo, aye ubena kulombelela mulume wanyi awo wabula kupuluka. Lesa ukaswisha lubuko.

Twayai tulombe.

¹⁹⁰ Lesa Mutemwe, Nalomba amba Anweba musakuswisha aa mapesho kwi aye. Panai yewa mwanamukazhi kukabila kwa muchima wanji, Nkambo. Lwitabilo lwanji luji bingi pepi ne Anweba, lwakukwata Anweba. Kabiji Nalomba, Taata, amba Anweba musa kukwasha, mu Jizhina ja Yesu. Amena.

Pano ketekelai na muchima wenu yense, amba mwikitambula. Mwakonsha kuuba kyokyo nyi? Kijitu bulongo. Lesa emupeshe.

Bushe waketekela mba balume bobo bakapuluka nyi, inetu? Mwaketekela na muchima wenu yense nyi? Suntulai kuboko kwenu, mwaketekela.

¹⁹¹ Kyamweka nobe, kumeso ami, mwanamukazhi ao wabaya bingi. Waikala popa. Mwaketekela mba amiwa ne kalume wakwa Lesa nyi? Mwaketekela mba amiwa ne kalume wakwa Lesa nyi? Mwikyuba nyi. Kijitu bulongo. Amiwa kechi nakuyuka ne. Ng'anyi lukatazho lomuji nalo, ke magilanti. Anweba muji nakinemenezhi. Obewa wakimonanganapo na dokotala, waambile mba kechi wakonsha kubapo kintu kimo pakikyene, bino awa wajinga dokotala wa panopantanda. Mwamona? Wenu... Wajingatu na bulanda bwavula bingi. Obewa wataya mulume obe. Obewa kechi wafuma kuno ne. Obewa kine wafuma ku Arkansas. Obewa ubena kukeba kwingila, ne obewa, kabiji kechi wakonsha kutana mingilo ne. Obewa wajinga na moyo wakuuba mba, kintu kimo, kechi wakonsha kwita ne. Bino lwitabilo lobe pano lwakwata Lesa. Nyenga yami, waya, waketekela. Lesa wakupele mwingilo, wakupa nkebelo ya muchima obe.

Lesa ushinikisha Kyambo Kyanji kwikala kya bukine. Mwaketekela kyokyo mba byo kiji nyi? Pano Nasaka namba anweba mundombebeleko ne amiwa jibiji.

¹⁹² Lesa Taata, Anweba mwi Lesa umo yenka washinikinshiwa. Inge Anweba mwaamba mba, "Awa nsongwakazhi kechi wafwa ne, aye walalatu," nanchi Wafwainwa kwikishinikisha. Pano, Anweba mwalaille mba, kimye kya kumpelo kasa kikyanye kufika ne, mba Mwaana muntu ukesolola Ayemwine mu musango umotu byonka byo Aubile mu Sodoma. Anweba mwikilaile, Nkambo. Pano Mwaiya pantanda, mu musango wa Mupashi Wazhila, kabiji twafikile mukachi ketu, bufuku buno, twaketekela bantu, kabiji bekishinikishe. Anweba mwashinikisha Kyambo Kyenu nobe byonka byo Mwauba joja juba. Nkambo, atweba kechi tukeba kushininkisha ne. Anweba muji mukachi ketu. Twimutemwa Anweba. Kabiji twavuluka mba akye kyo kiyukilo kyapelako Kwiyu Kwenu kasa kukyanye kufika, mwaila Binembelo. Kabiji bivule byonse ne bipasha kechi bikakalwa ne. Byafwainwa kwikala bya kine.

¹⁹³ Nanchi twalomba, Taata, nobe baana Benu byo babena kwiyu na kulombelelwa, yense wakutambula lubuko. Kechi

kwikale muntu wakolwa mukachi ketu ne, pa mpelo ya mpwijilo ya lubuko. Anweba Lesa mutemwe, Anweba musakuswisha kushingwa Kwenu kwikala kwa lusa pa bantu Benu ponkapano, amba uji yense umo wamwiabo wafwainwa kubukwa?

¹⁹⁴ Kabiji inge kuji bamo kuno, ao wabula kwikala Mwaana Wenu, kabiji namambotu abino bishinakata, amba... Abo bauvwa Kyambo ne kumona bintu kubiwa, mukufikizhiwa monka mwaila nkalata, kabiji Yenu Bang'anyi kabiji ne byo Muji, amba Muji muno.

¹⁹⁵ Kabiji, Nkambo, Anweba mwakonsha—Anweba mwakonsha kupesha bubela nyi? Kika, kechi ibyo ne, Nkambo. Bino Anweba mwalaile kupesha Kyambo Kyenu, kabiji kechi Kyakonsha kubwelatu ne. Kikafikizha kyokya kyo Kyatumijilwe. Kabiji pano Anweba mwauba kyokyo ku meso etu, bufuku buno, kwakubula ne luzhinauko ne.

¹⁹⁶ Kabiji mitwe yetu kasa kunyikwa panshi, kujipo bantu kuno babula kwitabilapo kala, abo bakonsha kutemwa kusuntula kuboko kwenu? Na mutwe wenu wakunama, suntulaikotu kuboko kwenu. Kabiji imanai, ne kwamba mba, “Amiwa pano naketekela, na muchima wami yense. Kabiji Nakeba kumutambula Yesu Kilishitu, ponka pano.” Mwakonsha kuuba kyokyo, bantu bonse, bantu bonse baji muno, abo babula kumutambula Kilishitu, kabiji nakeba kwi kyuba pa kino kimye? Amiwa kechi nakonsha kwi mubuula ne... Obewa yanga ku kipwilo kyo wasalulula. Bino Mbena kwimwipuzha amba mutambule Yesu Kilishitu kimye kyo... Anweba kiine kechi mukekala kwipi ne Aye ne poso anweba mwamumona Aye mubumuntu kimye Aye kyoakeya mukumweka Kwanji mumubiji kufuma Mwiulu. Anweba pano mwakonsha ku mwitaba Aye inge kechi mwikyuba kala ne?

¹⁹⁷ Ponka pakumona nangwa umo pano kwimana ne, Amiwa naketekela nachi anweba bonse kwikala batuntulu, bantu bamaana, kabiji nekutuluka abyoyomubena kuba. Inge mwaikala momwa mu kikyeyulukai, “Umwewe mwangumvwina buvu Amiwa kumeso a muntu, Ne amiwa kakumvwina bumvu kumeso a Ba Taata.” Kwajinga muntu umo waimene, kampe, ee, mu jibumba, kunyuma.

¹⁹⁸ Lesa Mutemwe, ao wakonsha, kechi Namona ne, waimana, babena kukeba kwimuswa Anweba. Bayuka, Nkambo, amba akye kechi kyaubiwa ne poso kino kimye, kabiji pano Anweba mwikikajika kabiji ne kushiniiikisha mba byo kiji. Nalomba, Taata, amba mu michima yabo, ako kekukwatwa kwapusanako pa kino kimye... Twayuka byepi kana awe ye muntu wapelako wa kutwela? Awe wafwainwa kwikala mpelo ya Los Angeles. Awe wakonsha kwikala mweo wapelako ao ukasemekwa mu Bufumu. Atweba kechi twayuka akya kimye pokikeya ne. Kabiji ne byokikoba, kibelo kikashinkika, Mubiji ukapwijijika. Kechi

ukekala Mubiji wakichika ne nangwa Musongwa wakichika ne. Kukekalatu ba membala bavula abo mazhina abo anembwa mu Buuku wa Bumi wa Mwanamukoko kintendekesho kya inontanda kasa kikyangye kwaalwa, ao iye Yesu yeabena kwiya nakusenda, nobe Adama, waendele nakupulusha mukazhaji. Nalomba, Lesa, amba Anweba musakwibatambula ponkapano mu Bufumu Bwenu. Baji mu maboko Enu. Ingila nabo, Nkambo, Nalomba mu Jizhina ja Yesu. Amena.

¹⁹⁹ Lesa apeshe yense wa mwi anweba waimene. Amiwa kechi nayukilepo nangwa umo wa mwi anweba waimene ne. Bamo baimene kunyuma, bamo peulu. Pano Nasaka namba anweba mungubilepo kintu kimo. Nasashijila ng’umvwishei ami. Kusambakana nabamo bamwingilo kuno ne kwisamba nabo, panyuma yakupwisha kipwilo. Kana anweba mukoba kyokyo nyi? Kechi muleke akya kikankalwe ne. Inge kechi mwakibatizhiwa mu lubatizhilo lwa Bwinakilishitu ne, mukobe kyokyo kyalondelapo, kabiji mwaikala na maboko enu peulu poso watambula Mupashi Wazhila.

²⁰⁰ Pano, kabiji bantu bavula baji na bitupa bya milombelo papo. Atweba tusakwibepuzha abo kwimana, kabiji nekwiya kuno, kabiji Amiwa naketekela kwenda bushiya. Nangwa Nakonsha kwiya...[Mulongo umo waamba mba, “Ine.”—Waku.] Amiwa kechi nakonsha kwikyuba ne. [“Iya kuno kulubaji.”] Kufuma *kululwe* lubaji kukwe, kyakonsha kwiya mujije jishinda, ku lulwe lubaji, bantu baji na bitupa bya milombelo.

²⁰¹ Kabiji pano inge mujipo bamo bafwainwa kuya, ke... Amiwa nataya kimye kyapwa. Ndekelaiko mambo. Amiwa nkeseka kuubako bulongo pacheche keesha bufuku. Pa...ke mamineti teni palutwe, na koloko pa kibumba. Nemusachila bingi pa bukwasho bwenu bufuku bunu, kabiji lekai Lesa wa Mwiulu emupeshe. Inge mwakonsha kutemwa kwikala ne kumona mulaini wa milombelo, kimye kyonse mwatambulwilwa. Bino tusakutatula kulombelela bakolwa pano, kabiji Amiwa kechi nakeba kwimukwachijila ne kanatu mubena kukeba kwikala. Anweba ne mupalanganya mu Jizhina ja Nkambo Yesu. Lekai mutende wa Lesa aye ne anweba kabiji emupeshe, kabiji ne kwimupa kukokoloka mu mibiji yenu, mu kimye kya bufuku, kabiji ne kwimupe bumi bwawama pakuuba mba mukabwele jibiji keesha bufuku. Lesa ekale ne anweba pano.

²⁰² Kabiji kekai aba baji nabitupa bya kulombelelwa bemane papo mumilombelo lonkaluno, nobe kimye kyonse byotuba pakulombelela bantu. Pano twakeba mba anweba muyuke, pano, anweba mwaimana na kitupa kya milombelo, mujipo luzhinauko mu bumi bwenu nyi? Bushe kujipo, lulekelo lwamambo kwi amiwa, bubi bonse buji mubumi bwenu abo bomwabula kwisolola? Inge kuji, lekai ne mwipuzhe kiky.

Kechi mwakonsha kwiya mu mulaini wa milombelo na bubi bwabulwa kusololwa mu muchima wenu ne. Mambo, obewa wafwainwa . . . Awe ye shinkwa wa baana, mwamona. Kabiji inge kechi wi Mwinakilishitu ne, pana bumi bobo kwi Kilishitu, mu mulaini wa milombelo, nishi iyai. Ke kya waitabila. Mwakonsha kwikyuba nyi? Mutambule Aye patanshi nobe Mupulushi obe, kabiji waiya ku pulatifomu, na kulombelelwa.

²⁰³ Pano Amiwa mbena kuya na kulombelela kila umo pamuntu; kechi kwi bapitaila ne, nobe mutanchi ubiwa jonse. Atweba tuji mu kipwilo pano. Nalangukuka mba Nyenga Wyatt witupa ene mambo a kuuba mba twakonsha kwikala ne kulomba. [Mulongo umo waamba mba, “Ee, bufuku bonse, kikulutu ubena kukeba.”—Waku.] Twakonsha kwikala monka mo tubena kukeba. Kabiji Nasachila Nyenga Wyatt ne wamwingilo kuno, pa kwituleka atweba kuuba kyokya. Lesa amupeshe. Aye mwatawanji wakosa bingi waimene kuno ku pulatifomu, ne kulombelelwa wakolwa, poso aye byoafwile, nobe byonka Amiwa byonayuka, mushilikale wakine wa musalabo. Kabiji pano Mbena kweseka kuuba kintutu kimo, peshai babo bantu.

²⁰⁴ Kabiji pano Nalomba mba umo umo mwi anweba waiya kuno . . . Anweba kechi mwafwainwa kwisololapo kintu kyo mubena kukeba ne. Obewa kechi wakonsha kwambapo kintu kimo kyatama kwi obewa ne. Kwiyatu na kwimulombelela, kabiji ne kuketekela.

²⁰⁵ Mwaketekela mba Lesa wantuma ami kuuba kikye nyi? Suntuilaiko kuboko kwenu. Vulukai awa Malaika wa Nkambo kyo aambile? “Inge obewa wakonsha kulengela bantu kukwitabila obe, waikala wakishiinka pa kulomba, kafwako nangwa kimo kikemana ku milombelo ne.” Kabiji mwayuka mba akyo kyakine. Kyashiniikishiwa kala, jikwabo ne jikwabo.

Pano Amiwa nsakwipuzha amba Nyenga yetu Rose, inge wakonsha, na kujizha kyokya, *Ketekelaitu Konka*, nangwa, *Ng’anga Mukatampe Pano Ke Pepi*, nangwa kintu kimo.

²⁰⁶ Nakeba umo umo mwi anweba pano mu—mu lumvwang’ano lwa bupopweshi pamo ne amiwa. Mwakonsha kuuba, ne apo, anweba bantu babula muiwe mulaini wa milombelo, mwakonsha kulombelela babo bantu nyi? Kyawama, mwibalaile kuuba byobyo, pakusuntula kuboko kwenu, “Amiwa kalombanga, monai. Bonse tusakulombanga.” Kijitu bulongo. Ee.

Nakonsha kuuba kyokyo mwakonsha, inge mwakonsha kufumapo, kuya mu kuzhindama ponka pano, pakuuba mba kechi bakonsha kukatazhiwa mu kimye kyo tubena kulomba ne.

Mwaketekela mba kisakupwa pano, nyenga? [Aye nyenga waamba mba, “Na muchima wami yense.”—Waku.]

Lesa Mutemwe, Nabika maboko ami pa nyenga, nakambizha kumanama kwa mubiji wanji. Mu Jizhina ja Yesu Kilishitu, lekai kimufume. Amena.

Akupeshe, nyenga.

Mwaketekela na muchima wenu yense nyi? Bubi bwenu bonse bwalekelwa? Obewa uji, kwalepa nobe byo wayuka, obewa winengezha kutambula lubuko lobe?

²⁰⁷ Lesa Mutemwe, Nabika maboko ami pa nyenga yami, mu Jizhina ja Mwaana Wenu, Yesu Kilishitu, kabiji nalomba mba byonse byakumanyika mubiji wanji byafwainwa kuya, mu Jizhina ja Yesu. Amena.

Bubi bonse bwazololwa, kabiji anweba mwinengezha ku kubukwa kwenu? Waketekela nyi, mulongo? [Aye mulongo waamba mba, “Naketekela na muchima wami yense.”—Waku.]

²⁰⁸ Lesa Mutemwe, Nabika maboko ami pa mulongo wami, byo twayuka mba Anweba muji muno, Nkambo. Nalomba mba Anweba musa kumubuka, mu Jizhina ja Yesu Kilishitu. Amena.

Bubi bonse bwashimunwa nyi? Ine, kechi mwakonsha kumvwa ne. Anweba mwaketekela mba anweba musakumvwa? [Nyenga waamba mba, “Naketekela. Bino Amiwa nashinka matwi.”—Waku.] Waketekela.

Awa mwanamukazhi washinka matwi. Atweba tubena kulombelela kuno.

²⁰⁹ Mutemwe Lesa, Amiwa nalomba mba Anweba mubuke awe nyenga yetu, ne kufumyapo abwe bukishinka matwi kufuma pe aye. Waikala mu ntanda ya panshi-peene, ako ko akonsha kubula kumvwa. Nalomba mba Anweba musakuswisha lubuko lwanji, kupichila mu Jizhina ja Yesu.

²¹⁰ Nsakwipuzha bantu amba bakunyike mutwe wenu, pa mineti umo. Nasaka kumona kikamweka kwi aye. Pano, nasashijila, mu Jizhina ja Yesu Kilishitu, kechi muleke nangwa umo asutuleko mutwe wanji nangwa meso ne. Bino, kechi wakonsha kuuba kyokyo ne kanatu Amiwa ne mubuula.

²¹¹ Mwakonsha nkung’umvwa kino kimye? [Nyenga waamba mba, “Bamo baikala ba kwalepa.” Mulongo Branham watota maboko anji kimye kimo. “Nakonsha kukumvwa obewa.”—Waku.] Ng’umvwai amiwa? [“Bamo.”] Bakonsha kumvwa nyi? Wakonsha kumvwa pano. [Mulongo Branham watota ne jikwabo.] Mwamona? Kumvwa aja jiji?

²¹² Bino waketekela na muchima obe yense. Usakuuba nyi? Kabiji waketekela, kabiji Lesa usa kwimukosesha. Aye waambile mba . . . Amiwa na kulombatu ne kubika maboko ami pa matwi anji, kabiji waambile mba wakonsha kumvwa kintu kimo. Kijitu bulongo, yaingatu pano, kasa twaitabila mba anweba mukomvwa kyalumbuluka, kabiji anweba mukomvwa.

Bushe bubi bonse bwashimuna nyi, nyenga? [Aye nyenga waamba mba, “Ee.”—Waku.] Obewa winengezha ku lubuko lobe? [“Ee.”]

213 Lesa Mutemwe, Nabika maboko ami pa nyenga yami, byo nayuka mba mwi atweba kechi mujipo kywawama ne, mwi atweba bene. Bino twayuka mba atweba twi Benakilishitu, twasemekwa ku Mupashi wakwa Lesa. Kabiji twateteka maboko pa nyenga yetu ne kwipuzha lubuko lwanji, mu Jizhina ja Yesu Kilishitu. Amena.

214 Pano waketekela mba usakubukwa nyi? [Aye nyenga waamba mba, “Kyawama.”—Waku.] Kijitu bulongo, pano anweba—anweba mwatambula lubuko. Ajo jo jishinda ja kwikyubilamo. Abyo ibyo. Ibyo.

215 Bubi bonse kwasololwa? [Aye nyenga waamba mba, “Ee, mwane.”—Waku.] Kabiji winengezha ku lubuko lobe? [“Ee.”] Mwaketekela, na kubika maboko, amba Lesa Ao wayuka michima ya bantu, usa kwi mulengela kwikalatu bulongo? [“Amiwa byonji.”]

216 Taata Wetu Wamwiulu, Nalomba mba Anweba musa kubuka nyenga yetu, byo tubena kubikapo maboko etu pe aye kabiji ne kwipuzha mu Jizhina ja Yesu Kilishitu amba Anweba musakumulengela kwikala bulongo. Amena.

217 Muji byepi? Nangwa byonkabyo, mwayuka mba Nayuka kyatama kwi anweba. Bino Amiwa kechi mbena kwikyambatu ne; mambo, anweba mwikyuba, ke—ke kutwajijilatu kuyakulutwe. Bino inge mwakonsha... Bushe bubi bonse bwashimuna nyi? [Aye nyenga waamba mba, “Ee, mwane.”—Waku.] Kabiji mwaketekela mba Lesa usakwimulengela kwikalatu bulongo nyi? [“Ee, mwane.”] Bushe mwaketekela kikola kya mashimba... Amiwa ne kyamba nyi.

Lesa Mutemwe, Nalomba amba Anweba musakumukwasha ne kumukosesha. Kiswishai kye, mu Jizhina ja Yesu.

Obewa kechi ukekala kilema ne. Yanga, ketekela na muchima obe yense.

218 Mwaketekela mba Lesa usakwimulengela kwikalatu bulongo nyi? [Aye nyenga waamba mba, “Amena.”—Waku.] Bubi bonse kwasololwa kabiji anweba mwinengezha kubukwa? Anweba mwaketekela mba nyuma yenu isakwikalatu bulongo nyi?

Mutemwe Taata Wamwiulu, Nalomba amba Anweba musa kumubuka kabiji ne ku mulengela kwikalatu bulongo. Mu Jizhina ja Yesu Kilishitu, lekai kikale byonkabyo. Amena.

Lesa akupeshe, nyenga. Yanga, pano ketekela.

Bushe bubi bonse kwasololwa, nyenga, anweba mwinengezha ku kubukwa kwenu?

Lesa Mutemwe, bubi bwanji, waamba mba, bwazololwa. Nabika maboko ami pa yiwe mwanamukazhi, mu Jizhina ja Yesu Kilishitu, twaipuzha lubuko lwanji. Amena.

²¹⁹ Bubi bonse bwazololwa? Mwafwainwa kwikala balumbuluka, anweba mwakolwa bingi, mwayuka kyokyo. Mwayuka mba Nayuka kyatama kwi anweba. Kabiji mwaketekela mba Lesa usa kwi mulengela kwikalatu bulongo nyi, kubuka muchima wenu kabiji ne kwimulengela kwikala bulongo?

Lesa Mutemwe, Nalomba amba mu Jizhina ja Yesu Kilishitu, amba Anweba musa kumubuka kabiji ne ku mulengela kwikalatu bulongo. Lekai kikye kifume pe aye, Taata, mu Jizhina ja Yesu. Amena.

Lesa emupeshe pano. Kuzhinauka ne. Yanga, ketekelai.

Bubi bonse kusololwa? Anweba mwinengezha kubukwa?

Mutemwe Taata Wamwiulu, Nabika maboko ami pa nyenga yetu. Mu Jizhina ja Yesu Kilishitu, ekale wabukwa. Amena.

Kechi muzhinauke ne. Yainga, ketekelai.

Bubi bonse bwazololwa, anweba mwinengezha kubukwa?

²²⁰ Mutemwe Taata Wamwiulu, Nalomba amba Anweba musakubuka mulongo wetu, musa kumukosesha. Kiswishai kye, Taata. Nateteka maboko ami pe aye, na mambo akikye kintu, mu Jizhina ja Yesu Kilishitu. Amena.

Lesa emupeshe. Nekiketekela na muchima wami yense.

Obewa pano waketekela nyi, nyenga? Bubi bonse bwazololwa kabiji winengezha ku lubuko?

Lesa Mutemwe, Nabika maboko ami pa nyenga, mu Jizhina ja Yesu Kilishitu, ekale wabukwa ku lukumo Lwenu. Amena.

²²¹ Pano nobe bimye byavulatu nobe byobyoyo, kukwatwatu, nobe Yesu byoambile, “Abye biyukilo bikebalondelanga baitabila. Umvwe babika maboko abo pa bakolwa.” Amiwa natatula kumona, mu mbungeno, amba kitatula kufika pa fifite pesenti mukuwama kukila byokyubiwa inge bantu baitwa mumulaini, mu kwikala na kuyuka bapashi, mambo wakonsha kumonatu bacheche. Kabiji, mujije jishinda, kuji bavula babukwa.

²²² Bushe wisolola bubi bobo bonse bwa kubula lwitabilo ne bintutu bikwabo nyi? Anweba mwaketekela pano mba musakubukwa nyi? [Aye nyenga waamba mba, “Ee, kabiji nekupokololwa.”—Waku.]

Lesa Mutemwe, Nalomba amba Anweba musakubuka nyenga yetu byo Mbena kusuntula maboko anji kabiji ne kwipuzha mu Jizhina ja Yesu Kilishitu pa lubuko lwanji. Amena.

Lesa akupeshe, nyenga.

Pano mwaketekela nyi? [Aye nyenga waamba mba, “Ee.”—Waku.] Bubi bonse kwasololwa? [“Ee.”]

Lesya Mutemwe, Nabika maboko ami pa nyenga yetu, mu Jizhina ja Yesu Kilishitu, mukuleta lubuko lwanji. Amena.

Lesya akupeshe, nyenga.

Kyamweka nobe kintu kicheche, bino ke Lesya Wikilaile.

Bubi kwasololwa?

Lesya Mutemwe, Nalomba amba Anweba musakubuka yiwe nyenga yetu. Kabiji byo Mbena kubikapo maboko pe aye mu Jizhina ja Yesu Kilishitu, lekai ayenga ekale bulongo. Amena.

Bubi kwasololwa?

Lesya Mutemwe, Nalomba amba Anweba musa kubuka nyenga yetu, byo Mbena kubika maboko pe aye, mu Jizhina ja Yesu Kilishitu. Amena.

Pano byo mubena kwiya na bulume bwa kumubiji, lekai kifikile pa bulume bwakwalula, kikengijiwa.

Bubi kwasololwa? [Aye nyenga wakumbula—Waku.] Obewa winengezha.

Lesya Mutemwe, Nalomba amba Anweba musa kumubuka kabiji ne ku mulengela kwikalatu bulongo, mu Jizhina ja Yesu Kilishitu. Amena.

Lesya akupeshe, nyenga.

Bubi bonse bwashimunwa? [Aye nyenga waamba mba, “Bintu byonse.”—Waku.]

Lesya Mutemwe, nobe yiwe mwanamukazhi byo abena kutala pa jiso jami, Naketekela kyokyo. Nalomba mba Anweba musa kumubuka, mu Jizhina ja Yesu.

²²³ Mwafwainwa kumuletatu aye, muji byepi, nyenga? Anweba mubena kumuletatatu? Kijitu bulongo. Waketekela, nyenga, amba Lesya usa ku kulengela kwikala bulongo? [Aye nyenga waamba mba, “Naketekela mba Lesya wakonsha kuupa meso ne jikwabo.”—Waku.] Lesya emupeshe.

²²⁴ Taata Wamwiulu, Anweba kimye kyonse mwiwalusa ku bampofu, kabiji ne ku byakukabila. Pano bamona abya byo Mwauba bufuku buno. Nanchi twaketekela, Nkambo, akye kiyukilo kikatampe kibena kwenda mukachi ketu. Amiwa naipuzha meso a yiwe mwanamukazhi mpofu kwiya kwi aye, mu Jizhina ja Yesu Kilishitu. Amena.

Pano, panai sawakya kwi atweba pano. Panai sakwakya.

[Nyenga waamba kwi Mulongo Branham—Waku.] Oo, ee, mwaketekela mba Lesya usa kwi mubuka nyi? [“Aleluya!”]

Mutemwe Taata Wamwiulu Nabika maboko ami pa nyenga yetu ne kwipuzha mba Anweba musa kumubuka, mu Jizhina ja Yesu Kilishitu. Amena.

Lesu akupeshe, nyenga. Twayai tumvwe byo—byo ubena kuya kulutwe.

Bushe waketekela nyi, nyenga? [Aye nyenga waamba mba, “Ee, Naketekela.”—Waku.]

Oo Anweba Taata Mutemwe Wamwiulu, Nalombelesa nyenga yetu, sambenakuketekela mba Anweba musa kumubuka pa kino kimye. Nateteka maboko ami pe aye, mu Jizhina ja Yesu Kilishitu.

Pano ketekelai. Abyo ibyo. Yaingatu, na kuketekela.

Bushe waketekela nyi, mulongo? [Aye mulongo waamba mba, “Ee.”—Waku.] Bubi bonse bwashimunwa?

Lesu Mutemwe, Nalomba amba Anweba musa kubuka mulongo wetu ne kumukosesha, mu Jizhina ja Yesu Kilishitu. Amena.

Waketekela, nyenga?

²²⁵ Oo Lesu, Nalomba mba, mu Jizhina ja Yesu Kilishitu, na kwikepesha, mu buwame ne bukimote bwa kino kimye, lekai Mupashi Wazhila alenge yiwe mwanamukazhi yense. [Aye nyenga waamba mba, “Kabiji Nalomba, lombelaiko mwanami. Amiwa kechi na kimumonapo pa myaka tweti ne.”—Waku.] Nalomba mba Lesu usa kutuma mwaanenu kwi anweba, nyenga, mutemwe. Lesu akupeshe.

Mutemwe Taata, Nalombelesa nyenga yetu kuno. Mu buwame bwa Mupashi Wazhila, lekai Aye eye abuke nyenga yetu, mu Jizhina ja Yesu. Amena.

Akupeshe, nyenga.

Lesu Mutemwe, Nalombelesa mulongo wami, byo aimana papo kabiji Nabika maboko pe aye, kabiji ne kwipuzha lubuko lwanji, mu Jizhina ja Yesu.

Akupeshe, mulongo wami. Kijitu bulongo.

Nsongwalume mucheche?

Lesu Mutemwe, na kubika maboko pa mucheche, Namupesha mu Jizhina ja Yesu Kilishitu, na mambo a lubuko lwanji.

Obewa waketekela pano nyi, nyenga? [Aye nyenga waamba mba, “Ee.”—Waku.] Ubena kukeba kulombelelwa ne obewa?

²²⁶ Lesu Mutemwe, Namulombelesa, byo Mbena kubika maboko pe aye. Pano, awe ye mwingilo Wenu, abyo byo Mwaambile mba ubai, “Abye biyukilo bikebalondelanga baitabila. Umvwe babika maboko abo pa bakolwa, bakakosa.” Anweba mwi kyambile, Nkambo. Amena.

Pano, Aye waambile kyokyo, kechi ibyo nenyi? Kyafwainwa kwikala muyewo musango, nyenga.

Lesu Mutemwe, Nalomba amba Anwebu musakubuka nyenga yetu ne kumukosesha, mu Jizhina ja Yesu Kilishitu. Amena. Lesu akupeshe, nyenga.

Anwebu mwayi kasa mwaketekela, nyenga?

²²⁷ Mutemwe Taata Wamwiulu, Nalomba mapesho Enu pa nyenga yetu, na kukokela Anwebu byo mwaambile mba ubai. Anwebu mwaambile mba, “Abye biyukilo bikebalondelanga baitabila. Inge bateteka maboko abo pa bakolwa,” Anwebu mwaambile mba, “bakakosa.”

²²⁸ Lekai Ngimaneko ponkapo pa kakimye kacheche, ne kwaamba kiky, pakuuba mba mukaleke bantu bekaleko kimye kicheche, pa ka kimyetu kacheche. Kajimbulushi kimye kimo waambile mba, kwi amiwa, akyo kechi byo kiji ne. Bino, mwamona, Aye waambile mba, “Abye biyukilo bikebalondela.”

²²⁹ Mwaumvwapo Mbila yami pa *Ke Lweseko*, na kubikapo Yesu mu lweseko. Mwamona, Aye wabuujile Nowa mba, “Mvula ikanoka.” Kechi yanokele pa myaka aduleendi tweti ne, bino yanokele nangwa byonkabyo. Aye wabuujile Abulahama mba ukekala na mwaana mwi Sala. Kyajinga myaka tweti-faivi palutwe. Aye kechi waambilepo kimye ne. Aye waambile mba bakekala na mwaana. Myaka tweti-faivi palutwe, kyamwekele. Mwamona, Aye kechi waambile kimye po kikobiwa ne.

²³⁰ Aye waambile mba, “Milombelo ya lwitabilo ikamupulusha wakolwa. Lesu ukebabushapo. Inge bateteka maboko pa bakolwa, bakakosa.” Abyo ibyo Aye byo aambile? Aye kechi waambile mba bakonsha kutoloka kabiji kwikyuba ponkapatu ne. Aye waambile mba, “Bakakosa.” Mwamona, awo ye mulaye Wanji. Abyo byo twaketekela.

Iya, nyenga. Mwaketekela kyokyo mba kyakine nyi? [Aye nyenga waamba mba, “Ee, Naketekela.”—Waku.] Nanchi kafwako kyotwakonsha kwimukanya kufuma kukutambula lubuko ne.

Nabika maboko ami pa nyenga, mu Jizhina ja Yesu Kilishitu, mukuleta lubuko lwanji. Amena.

Bushe waketekela nyi, nyenga? [Aye nyenga waamba mba, “Ee.”—Waku.] Bubi bonse bwashimunwa, kabiji winengezha?

Lesu Mutemwe, Nabika maboko ami pa nyenga, mulukokelo ku mukambizho Wenu, kabiji ne kwipuzha lubuko lwanji, mu Jizhina ja Yesu. Amena.

²³¹ Amiwa mbena kukeba anwebu mubena kulombelelwa, Amiwa mbena kukeba anwebu nkukwansha ami. Amiwa mbena kukeba anwebu kupana sawakwa, ino mbungeno kasa ikyangye kupwa, bisakumweka; kabiji lekai jibumba, ne bantu bakwabo, bamone bisakubiwa pano. Kampepo keesha, juba ja londelapo, nangwa kimye, mumone kyakonsha kumweka.

²³² Ami emela yami yamweshwa mba ke—ke kyapusanako kyakwibaleka kasa babena kujila, esekai lwitabilo lwenu. Mambo, Yesu waambile mba, “Babikile maboko pe abo. Bakabika maboko pe abo, abo bakakosa.” Pano umvwai Aye kyo aambile. Aye kechi waambile mba bakonsha kutolokela peulu ne panshi-ne-pashi pa mushiji ne. Bakonsha kuuba kyokyo. Bino Aye waambile mba, “Bakakosa.” Abyo ibyo Aye byoambile nyi? Abyo ibyo Aye byoambile. Abyo byo Naketekela. Kabiji Aye uji pano, Iye waambile mba Kyambo kiji pano na kuuba kyokyo.

Mwaketekela nyi, mwane? [Aye mulongo waamba mba, “Amena.”—Waku.]

Mutemwe Taata Wamwiulu, pa kwisolola kwa lwitabilo lwanji kabiji ne kuketekela, Nabika maboko ami pe aye, mu Jizhina ja Yesu Kilishitu, mukuleta lubuko lwanji.

Lesa Mutemwe, Nabika maboko ami pa yiwe mwanamukazhi, mu Jizhina ja Yesu Kilishitu, ku lubuko lwanji. Kijitu bulongo.

Mutemwe Taata, Nabika maboko ami pa iwe mwanamukazhi, mu Jizhina ja Yesu Kilishitu, ku lubuko lwanji. Mwaambile mba, “Aye ukatambula lubuko.”

Mwinengezha kutambambula lubuko, nyenga?

Lesa Mutemwe, Nabika maboko ami pe aye, mu Jizhina ja Yesu Kilishitu, amba Anweba musa kumubuka.

Kijitu bulongo, nyenga, mutemwe, bintu byonse byanengezhiwe lubuko? Lwitabilo lobe lwaubiwa pano, waketekela mba usa kwikalatu bulongo?

²³³ Kabiji, Lesa, Nabika maboko ami pe aye, mu kukokela mikambizho Yenu, “Ku ntanda yonse, kilengwa kyonse.” Amiwa natenteka maboko pe aye, mu Jizhina ja Yesu, mukuleta lubuko lwanji.

Lesa Mutemwe, Nabika maboko ami pa mulongo wami, mu Jizhina ja Yesu Kilishitu, pa lubuko lwanji.

Lesa Mutemwe, Nabika maboko ami pa nyenga yami, mu Jizhina ja Yesu Kilishitu, ku lubuko lwanji.

[Kafwapo bijipo pa tepu ne—Waku.]...kuyatu kulutwe mu mawaya. Amiwa kechi najikukebanga kwimukokeshwa ne. Anweba musakwikalatu bulongo inge mwakonsha kuketekela kyokyo pano.

Lesa Mutemwe, Nalomba amba Anweba musakubuka nyenga yami, mu Jizhina ja Yesu Kilishitu. Amena.

[Kafwapo biji pa tepu ne—Waku.]...mu kukwasha amiwa kulombelela babo bantu.

²³⁴ Pano tuji na tutambala kuno, kabiji ne bikwabotu, muno, pakuuba mba bilombelelewe. Kabiji Nakeba mba anweba mutwajijile na kulomba ne amiwa, pano, atwe tubipe tuheche,

pano. Nayuka mba akye kyaumvwanika bingi kyenya ku bantu mukulombelela kintu kicheche kiji nobe bibye. Bino inge wakonsha kwiya mu ofweshi wami, pa kimye kimo, kabiji mwakonsha kutajishatu bulongo. Inge twatwajijila kulama lushimuno pamyaka yonsetu, Amiwa naketekela mba kechi twakonsha kuvula twatantama bibye kuno kupulatifomu ne, akyo kyakutambulatu lubuko monka mukutuma atwe tutambala nobe bibye, malyoni aba mwiabo kuzhokoloka mwaya ntanda. Pano, mwayuka byo kiji—byo kiji?

Muntu umo usenda koka katambala kokwa na mambo a—a yewa mwanyike. . . Mwakonsha kuyuka katambala kobe, wakonsha nyi, mulongo? Kijitu bulongo.

²³⁵ Kabiji Namona bichechetu, banyike bamikombo kasa babena kubukwa. Kabiji mwamona, byokiji, ke kintu kyakukwatankana nakyo, nobe byonka byaambanga Oral Roberts. Ke kintu kyakukwatankanatu nakyo. Atweba twalomba. Pano, kechi tuba kikye atweba bene ne, tuba kikye mambo Baibolo witupa mwingilo wakuba kyokyo. Atweba bonse twayuka mba akyo kyakine.

²³⁶ Pano, kuji bantu bavula bingi abo bashinga manyi tutambala, ne bikwabotu. Kyawama, pano, twalanguluka mba kijitu bulongo, kine, pano inge atweba twauba. . . Aye Baibolo kechi waambile mba “washingwa” tutambala ne.

²³⁷ “Bino basendele kufuma ku mubiji wakwa Paulo tutambala.” Pano monai kyo Najikwambangapo? Pano, kyo bamwene, abwa bulume bwa kusangulula bwajinga mwi Paulo, amba bayukile mba wajinga kalume wakwa Lesa. Abo bayukile mba Lesa wajinga mwi aye. Abo bayukile mba bintu byonse byo akwachile byapeshiwe. Baanga baumvwa kyokyo? Ambai mba, “Amena.” [Kipwilo kyaamba mba, “Amena.”—Waku.]

²³⁸ Mwayukatu, Nalanguluka mba Paulo wajinga Kyanembwa bingi mu byo aubile. Kechi mulanguluka byobyo nenyi? Ukena kukeba mba amiwa ne mubule ko Nalanguluka mba aye uji na buyuke bwa kwikyuba? [Muntu umo waamba mba, “Kufuma kwi Elisha.”—Waku.] Kufuma kwi Elisha, abyo ibyo. Monai, Elaija waambile mba, “Tola kikye kitambala ne kuya ukekiteteke pa mwaana.” Kabiji ngauzhi watumine kitambala mambo aye wayukile mba bintu byonse byo akwachile byapeshiwa. Aye wayukile kifulo kyanji. Aye. . . inge wakonsha kutola mwanamukazhi waketekelatu kintu kimo.

Pano monai, bino, Baibolo kechi yaamba mba, “Balombelela bakolwa ne.” Kyaambiwa mba, “Bakabika maboko pa bakolwa.”

²³⁹ Pano ngilangulukaitu, bantu bamwene, mu Petelo mutumwa, Kyeenyi kya Lesa kyamweka mu yiwe muntu, kyakuuba mba abo—abo balengele ne bantu mu kimvule kyanji, kabiji babukilwe. Baanga bayuka mba akyo Kyanembwa? Akyo kijitu Kinembelo nobe byonka biji Yoano 3:16. Mwamona, Ke

Kyambo kya Lesa kyonse. Pano, bantu, mwayukatu kimvule kya yewa muntu kechi kyo kyabukile bantu ne.

²⁴⁰ Bino, talai, inge bulume bwa Lesa bwajinga pa yewa ngauzhi, pa myaka yavula kabiji panyuma ya kufwa, kyakuuba mba muntu wafwa watailwe pa mubiji wanji, bikupa byanji. Mubiji kechi wajinga ne; bikupa byajingako. Kabiji Kyeenyi kya Lesa kyajinga pe abya bikupa, poso awa muntu wafwa waikala na bumi.

²⁴¹ Pano kechi mwayuka mba awa Lesa umo waubile byonse bye bintu uji monka muno bufuku buno? Kwi—kwi amiwa, Nalanguluka mba twafwainwa kwikala bantu bakila bingi kuwama pantanda ponse. Anweba langulukaitu pa kikyeye.

²⁴² Na—Naketekela mba kechi Njipo na jibumba jami ja kuketekela mba ke kintu kimo kyo Nguba amiwa mwine. Anweba—anweba mwayuka bingi bulongo pa kyokyo. Ami, Amiwa ne mulongo wenu, monai, kabiji Amiwa ne mulongo wenutu.

²⁴³ Bino Nayuka, Nayuka kikyeye, amba Lesa uji muno. Kabiji Nayuka mba Aye witupa kintu kimo kwi atweba, kyakuuba mba kechi twakonsha kwikilondolola ne, kanatu kupichila mu Kyambo kya Lesa, kyaamba mba kyafwainwa kwikala pa kino kimye. Nanchi, kitupa ne atweba kuyuka mba tubena kwikala mu moba apelako. Kitupa atweba kayukilo kakuyuka mba abe bantu, awe wasalululwa, wafukulwa, waitwamo-kulupukamo, watongwejlwejimo . . .

²⁴⁴ Pano, akyo ke kyambo kikatampe, *kyatongwelwa jimo*, bino atweba bonse twayuka mba kya bukine. Atweba kine twayuka mba Lesa wabula mpelo witutongwejile jimo bintu byonse monka mukuyukila jimo kintendekesho kya ino ntanda kasa kikyangye kwikalako, ne Mukoko waipailwe jimo; kabiji ne jizhina aja jajinga kala mu Buuku, jabikilwe mu Buuku kasa Buuku akyangye kunembwa ne. Pano baanga bayuka mba akyo kyakine?

²⁴⁵ Kabiji Yesu waishile na—na kukuula aba bajinga mu Buuku. Mu Baibolo, Mukoko waishile kufuma kunyuma ya kipembe, kabiji ne kusenda Buuku ne kuzhikula Tutetesho ato Twashikile ponka, mambo Aye wayishile na kwamba byonse byo Akujile. Aye pano ke Wakulombelako pano, ke Wakulombelelako mu mukulombelela abo Aye boakujile. Byonse biji na jizhina janembwa mu Buuku wa Bumi wa Mwanamukoko, byakuulwa.

²⁴⁶ Nobe byo Naambile ng'ambilo icheche yakosa bufuku bukwabo . . . Amiwa mbena kupembelela . . . yonse tutwe tutambala papo. Amiwa kechi mbena kwesekatu kusapwila jibiji ne, bino Naambile mba kuji ng'ambilo icheche . . . Naketekela mba akye kechi kisakumvwanika myendeleko ne, mwamona. Bino nobe njimi byoanengezha kyaje, kabiji kechi ujipo na maake ne, nanchi aye watolele jiike ja mpungu, kabiji aye

wabikile munshi ya kyaje kabiji aye watetwile mpungu. Kabiji wajinga mulongo umo wapusanako bingi ku banzolo bonse, mambo kechi bamwenepo bintu ne. Bino amba aye byobyonka byoamweneko, ke kyaje. Aye wauvwinetu jiwi, kechi kyauvwanyikile nobe jiwi janji. Bino aye kechi wakonshe kulenga jiwi nobe jakyaje ne nangwa ja twanatwanzolo ne. Aye kechi wakonshe kuvwa bulongo nanjilo yabo ne, mambo njiilo yabo yajinga yakupalaya. Pajipo kintu kimo kyapusanako kwiaye, nangwa byonkabyo aye kechi wayukile lupusano byo kyajinga ne.

²⁴⁷ Kabiji pano juba jimo, kwajinga inaja mpungu ao wayukile mba wasemenepo maake avula. Kabiji kwajinga jiike jimo pa avula, ajo jajinga janji mwaana, wajinga wataika. Nanchi aye waile nakukeba aye, kabiji wamutaine aye mumuzhi. Kabiji wabijikile. Kabiji byo babijikile, mpungu mucheche wayukile jiwi ja bainanji. Nobe byonka byaambile Yesu, “Mikoko yami yumvwa Jiwi Jami.”

²⁴⁸ Nalangu luka mba, bufuku bwapita, byo Namwene aja jibumba ja ba Baptist, Presbyterian, kabiji ne bikwabotu-byavula, balingilwe kukomeshiwa ku kyaje. Ndekelaiko mambo, mulongo, mwamona. Bino Inanji wayukile Aye wajinga aye na Batemwikwa kuntu kumo. Nanchi aba banabalume baimene kokwa, kechi mukubula kujisha abo aka kajo kajinga kufuma ku inanji kyaje, kabiji nanchi ne bikwabotu, bino ke bampungu, mwamona, abo batumbuka mukukeba aka kajo kabo. Mwamona?

²⁴⁹ Kabiji Nalangu luka mba kipwilo kijitu pamo nobe akyo Amiwa kyona mweene nobe kechi papita kimye kyabaya ne, kufuma ku Tucson, nangwa kufuma—kufuma ku Phoenix, kuya ku Tucson. Namwene mwekelo ya bukyafyamika. Kabiji kyajinga nobe kyachibakanya muchima wami, kumona kyamwekele, abyo...ke byapi, abyo bikonsha kwingijishiwa kutumbukilako mumwela, ke muluno ku mulongo, akyo kyaikala kipasha kya kipwilo.

Kabiji Yehoba ye Mpungu. Aye waichile bangauzhi Banji “bampungu.” Aye witelele Ayemwine mba, Yehoba, “Mpungu.”

²⁵⁰ Bino awe mpungu wataya kayukilo kanji, mambo kechi bibena kutumbuka kupitaila mumwela ne kabiji ne kuya nakwipaya nyama nobe byaketekelwa ne. Bino kyaikala pafoni yakubula kunungakankana ne kumweshwa byubilo nobe kikwangala. Aye—aye ke kibinda wabyafwa atwa tululu ato tobampunka kumyotoka, kabiji aye kikwangala ke kutola ne kushukilwa byakuja byonse. Aye usenda nobe kikwangala, kyalinga amba aye endenga byoakonsha kwendela. Aye wataya kayukilo kanji.

²⁵¹ Kabiji Naamba kikye na butemwe bwa bulesa ne mushingi, kipwilo kyataya kuyukanyikwa kwanji nobe nyenga mpungu.

Aye waikala popa. Mukifulo kya kupoya mu Kyambo ne kutana kana abye bintu biji bulongo, aye upembelela aja jibumba jaba funjishi wa sukuulu wa Pamulungu abo balenga jibumba jabamana aku kuntu kumo, tumo tululu twaipaiwa kuntu kumo. Kusenda nobe kikwangala! Lesa etukwashe kutumbuka kuya kufuma kukyokyo.

Aye milaye ya kine. Kechi byobya byaambile muntu pa Kikye ne, pakuuba abya Lesa byo ehabuujile! Abya ke byakiine. Amiwa nachi naikala walusekelo nakutanwa na bampungu.

Twayai tulombele pamo pa bakolwa betu.

²⁵² Mutemwe Taata Wamwiulu, twafunjishiwa mu Baibolo mba basendele tutambala ne maepulo kufuma ku mubiji wakwa Paulo, kabiji bademona balupukile mu bantu, kabiji mipashi yatama yafumine mwi abo. Pano, Taata, amiwa naimana pano pa tutwe tutambala, kyaimenako muntu yense uji muno. Ke Mubiji wa Kilishitu, atweba pamo. Tubena kwamba mba, konka ku lusa ne butemwe, amba tuji pano na kwimenako Musongwa Wanji, kabiji ne kuketekela, kukwatakana Nanji mu Bufumu Bwanji. Kabiji twayuka mba atweba kechi twi Paulo Wazhila ne, bino twayuka mba Anweba mukijitu Yesu.

²⁵³ Kabiji twalomba mba Anweba musakupana ku lwitabilo lwa baabo bantu. Inge baikelenga mu moba akwa Paulo, bafwaijilwe kumvwa ao Mamboawama amo, bamwene bibye bintu bimo. Onkao mambo, ke musango umo wa bantu. Obewa wi Lesa umotu. Nanchi Nalomba, Lesa Mutemwe, amba Anweba musakunemeka lwitabilo lwabo, nobe byonka Byo mwaubile mu moba a Baibolo. Kabiji lekai bulume bonse bwa bademona, misongo yonse, makatazho onse, abyo byakwata bantu natutambala ne bipe bya panwa kuno, lekai abwe bulume bwatama bwamisongo bifume peabo.


²⁵⁴ Kyaambiwe, kimye kimo, amba Isalela waendeshenga mu ndonda ya mwingilo, kuya ku ntanda ya mulaye. Kabiji monka mu ndonda ya mwingilo, mulwanyi waishile na kwibakajikizha mu koonna, kabiji ne Kalunga Kachila kebachibijileko kufuma kumulaini wamwingilo, kabiji ne kipwilo kyabo. Kabiji Lesa watajile panshi kufuma mwiulu, kupita mu Mumbulungwa wa Mujilo, kabiji ne kalunga kaumvwine moyo. Kyafumishemo aamanyaki, mambo manyaki akwa Lesa ajinga ponka pakachi ka kalunga kameema. Kabiji Kyalengele jishinda ja baana Banji, kwenda mu ndonda ya lukokelo.

²⁵⁵ Pano, Lesa, inge aka Kalunga Kachila kakonsheshe kwibachinya, kabiji ne kufumyako manyaki, wafuminyeko meema, kabiji wapele baana bamulwendo kuya kulutwe mulukokelo; Lesa Mutemwe, bufuku buno, talai panshi kupita mu Mashi a Mwaana Wenu, Yesu, Ao walaile. Kabiji atwe tutambala byo tukabikwa pa mibiji ya bakolwa ya bantu, lekai meso akwa Lesa atale, kabiji lekai aya misongo, awa diabola,

ekala na moyo ne kufumako. Kabiji lekai bantu bekale palwendo lwa kuya ku Ntanda ya mulaye, na bumi bwawama ne bulume. Nobe Isalela byoandele kupita mukiselebwa, kafwako nangwa umo wajinga namooyo ne mukachi kabo, kulubaji lukwabo. Lekai kipewe ku baabo bantu, Taata, mambo tutuma tutwe tutambala, mwi Yesu Kilishitu mu Jizhina. Amena.

²⁵⁶ Lesa emupeshe, pa muntu pa muntu. Byo mubena kutambula tutambala twenu, mwaketekela na muchima wenu yense. Mwaketekela mba Lesa umvwa kikye nyi? Mwamona? Na—Nasaka kwamba kikye. Kechi, kechi uzhinauke ne, nangwa pachechetu ne. Monai, kyakonsha kumweka kwikala kyenzi bingi. Ndekelaiko mambo, pa mineti umotu. Kechi muzhinauke ne, nangwa pachechetu ne. Bino ketekelai pano mba, kyo twaipuzha, Lesa wikipana.

²⁵⁷ Mwaketekela mba Lesa uji muno, wayuka kyafyamika kya mu muchima wenu nyi? Mwayuka ne kuketekela mba awa ke Lesa? Pano lamai milanguluko yenu, kechi kyakonsha kwikala kintu kingi ne. Mwamona?

²⁵⁸ Pano, bushe inge kwakonsha kwikala keesha mukantampe, myaka yakunyuma yapitapo yakonsha kwikala jishimikila japita. Kabiji bantu, mu myaka ya kwiya, inge kyafwainwa kwikala muyewa musango, bakonsha kwiya ne kwamba mba, “Kyawama, inge Najinga na bumi pa kyokya kimye, Namwene kyokya kyaubiwa, mulunda, byo byonka byo Nakonsha kuyuka. Amiwa nakonsha kuketekela bulongo ponkapa nanchi!” Monai, kintutu kimo kyo mwaketekelamo, inge mwajinga kunyuma kokwa byo Aubile kyokya kimye! Vulukai, kikijitu Aye. Ke Bumi Bwanji mwi obewa. Lesa emupeshe. 

65-0426 Kushinikisha Kyambo Kyanji
Otela wa Ebbasi
Los Angeles, California U.S.A.

KAONDE

©2026 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Kayukilo ka kuvuzha

Luusa lonse luji kubene. Awe buuku mwakonsha ku mupulita ku kya kupulitako kya pa nzubo pakuuba mba anweba bene mwakonsha kumwingijisha nangwa kupaanwa, kyatuutu, nobe jishinda ja kunsampwilamo Mambo awama a Yesu Kilishitu. Awe buuku kechi wakupotesha ne, kulengamo avula, kutumwa palubesha, kufiwa mu makopyuta, kututululwa mu milaka ikwabo ne, nangwa kwingijisha mukumwenamo mali kwakubula kuswisha kwanembwa kufuma kuba Voice Of God Recordings®.

Pakukeba kuyukilapo bikwabo nangwatu mabuuku akwabo, mwane tumai pa:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org